

四庫全書

經部

欽定四庫全書

經部
五經義測卷一

詳校官給事中臣王鍾健

給事中臣溫常綬覆勘

覆校官中書臣朱 鈐

校對官助教臣汪錫魁

謄錄監生臣黃 佑

欽定四庫全書

經部七

五經蠡測

五經總義類

提要

臣等謹按五經蠡測六卷明蔣悌生撰悌字叔仁福寧州人洪武初以明經官訓導是書乃元季

避兵藍田谷中所作嘉靖戊戌

案原序內不題年號但稱戊戌

以序中一百六十餘年語推之知為嘉靖十七年

浮梁閔文振纂修

州志始得稿於其裔孫宗雨序而刻之前有

洪武庚戌梯生自序凡易一卷書一卷詩三
卷春秋一卷後有文振附記曰右五經詩說
獨多易書次之春秋為少禮記亡闕今猶題
曰五經蠡測仍其舊也云云今觀其書或載
經文或但標章句之目所說或大書或夾註
體例絕不畫一蓋猶未成之藁草又尚書大
甲篇首有曰詩書小序前已詳言之矣然以
前絕未論詩書序則不但禮記散佚併尚書

亦有佚脫也其說易多斟酌程傳本義之異
同如解頤卦虎視眈眈其欲逐逐謂大臣之
求賢為助如虎之求肉為食穿鑿太甚如解
龍戰於野謂坤不得稱龍龍即乾卦六爻之
龍陰盛而與之戰嫌於元陽故稱龍以明陽
未嘗元則立義特為正大其說書於蔡沈集
傳多所訂正解盤庚疑有錯簡三章未免因
王栢謬說又加推廣至於高宗彤日謂果為

高宗之事則當稱王不當首稱廟號用鄒氏
音釋之說以為祖庚祀高宗亦不為無見其
說詩謂小序因有紕繆而未子疾之太甚於
諸篇同異務持兩家之平在元明之間可謂
屹然獨立無依門傍戶之私至其以鴝鳩為
美周公乃豳風之詩錯簡入於曹風則又臆
斷之餘習矣春秋僅說滕子來朝子同生夫
人姜氏遜於齊夫人姜氏會齊侯於禚公及

夫人會齊侯於陽谷齊仲孫來六條

案進於齊與會

糕合為一條

而仲孫一條與陽穀一條年月又復

顛倒其說不甚主胡傳然既曰胡傳不合筆削之初意又曰聖人復生亦將有取於胡氏之言又何必一一盡合於筆削之初意則於胡傳亦尚在疑信間也大祇僻處窮山罕窺古籍於考據引證非其所長而覃精研思則徃徃有所心得名雖不及熊朋來書則實在

朋來上也乾隆四十二年三月恭校上

總纂官臣紀昀臣陸錫熊臣孫士毅

總校官臣陸費墀

五經蠡測原序

愚幼讀書略曉文義其或未通師友問辯既退猶有疑未釋者及壯至老其素所嘗疑輒尋經傳本旨反覆參究旁摭証據疑終未能解所恨窮居僻處孤陋寡聞不能訪求良師益友以質所疑每欲筆而志之以俟後之同志又恐獲僭議先儒之罪握筆屢投者有日今老矣輒復編而紀之名曰蠡測蓋以愚之膚識淺學而敢輕議先儒得失亦猶以蠡測海多見其不知量之意庶幾

他日見者未減僭踰之罪并以平日讀書傳義之外已
意管見作為衍說類附於後或者窮經有知我者於中
取其一二焉亦以見愚之素心非敢妄為是言也洪武
庚戌八月甲子後學蔣悌生仁叔序

欽定四庫全書

五經蠡測卷一

明 蔣悌生 撰

周易

大象

上一句是天地萬物之象下一句是人事萬物有自然之象故人事有當然之則以用也萬物本乎天人能取法於天用天之道以修人事則事事當理而不違帝則矣

大象之例雖一律然六十四卦之中亦隨時取象取義未免變易小殊有取法而修

已德者如乾坤之類是也。大抵此義居多，亦有法其象而修人事者，如師比履頤之類是也。有懲其失而致戒者，如訟剝之類是也。有因其時而隨所宜者，如屯蒙隨之類是也。有兼理義時意而言者，如泰否同人大有之類是也。有當其時而無所爲者，如需卦之類是也。有因其名而廣其理者，如節渙之類是也。有繹其意而施諸用者，如豫卦之類是也。有推其理而致其功者，如噬嗑豐之類是也。以是數者求之六十，四卦之中，大抵不越乎此。然其用天之道以修人事，則一而已。

卦爻中陰陽交錯剛柔相應

天地間一陰一陽而已。六十四卦皆陰陽交錯而成。自始至終，皆二卦相對待。乾坤坎離頤大過復姤剝。

夬中孚小過此十二卦六爻陰陽各相對待其餘卦皆卦體翻轉相對待乾交于坤爲咸恒坤交于乾爲損益咸恒坤外乾內陰包陽有男女交構之象故二卦彖辭多取男女交感之義損益乾外坤內陽包陰有君上統民之象故二卦多取民事損益之義剛柔相應乃卦中大義凡卦爻皆以相應而致吉亨不相與而致凶咎凡卦八純卦皆無應與六爻皆有應與惟泰否咸恒損益旣濟未濟八卦爲然蓋乾坤爲萬

物之宗六子之父母二卦純體對待于上兩相應與
非如他卦陰陽交錯自爲應與乾坤二卦三索而成
八卦八卦交錯而成六十四卦然後萬物生焉乾坤
之德廣大故彖辭只贊其德之盛言之不足又作文
言以敷暢其義不必言其應與而彖辭中所謂資始
資生順承德合等語又即含剛柔應與之義乾坤居
首屯次之彖辭先言剛柔始交而難生首發剛柔應
與之義所以明天地不交剛柔不接則萬物無由生

天地交剛柔接然後萬物生生不窮他卦中但有剛柔相應彖象必取其善在二五爻尤為至善彖辭不言者鮮坎離亦不言應與者坎中實有篤實之德離中虛有文明之德亦兩相應與不待言也萬物皆天地所生故乾坤居上經之首民生非水火不食故坎離居上經之終乾坤二體交而成咸恒居下經之始坎離二體交而成既濟未濟故二卦居下經之終乾坤為天地陰陽之全體咸恒為人道陰陽之大用坎

離爲天地水火之全體既濟未濟爲人事水火之大
用震巽艮兌爲雷風山澤于民生日用視水火爲差
緩故此四卦混繫于下經雜卦之中聖人序易篇次
亦不苟也乾坤二體互分上下爲泰否六爻皆有應
與彖辭不言者天地交而萬物生天地不交而萬物
不生此義尤大故彖辭直言小往大來大往小來而
不取應與之義至艮卦乃言上下敵應不相與也未
濟之終又言雖不當位剛柔應也可見此義甚大

䷀
乾

九四或躍在淵无咎

程傳云淵龍之所安朱義謂淵爲空洞不測之所雖小異大抵或字

爲未定之辭文言明說或之者疑之也疑之故无咎蓋聖人到此位此時居臣民之上人君之下位已逼于君故不敢有固必之心若有固必之心則危而有咎矣後世大臣世子居逼君之地居之無忤行之不疑而卒致大咎者多矣不知或字之義也

文言初九曰潛龍勿用何謂也子曰龍德而隱者也不

易乎世

程傳解不易乎世謂守其道不隨世而變朱義曰不變其所守嘗反覆讀經易字恐此易字當

與天下有道丘不與易之易同義蓋言道之行則可以變易世俗道既不行不能變俗是以不能成名既

不能成名則宜退避而隱然不見是而愠者常情也
不見是而无悶者聖人之德之盛也雖然聖人之心
曷嘗一日而忘天下哉行道而濟時者聖人之本心
故曰樂則行之不用而隱遯者非聖人所願欲也故
曰憂則違之雖然其進其退莫不求至理之所在未
嘗枉道以徇人也故曰確乎其不可拔若易字作不
隨世而變說則與國有道不變塞國無道至死不變
之義同與下文確乎不可拔語似重複若作不能變
俗說則于潛隱之
義為切文意亦順

九二龍德正中

程傳曰以龍德而處正中者也在此卦之
正中為得正中之義此正中字與他卦正

中義異他卦九居五為居中得正九居二為中陽居
陰位為不正中重于正中則無不正正未必中此他
卦二五爻之例惟乾卦九二言其德其位正合乎中
其德已盛其施已博但未居君位耳非他卦可比

九三居上位而不驕在下位而不憂

聖人處此地位進則逼于上而時或

未可退則人共知而不得潛最人所難處也聖人惟務進德修業而已時進則進時止則止我何心哉于我何與焉若出于有意則驕憂生矣故乾乾因其時而惕時字正解爻辭終日夕之義見聖人省察之心斷也無少間

進德脩業

此四字乃一章之綱領忠信所以進德乃進德之基本知至至之可與幾也爲進德之大

用脩辭立誠乃修業之本體知終終之爲修業之成功上二句皆以所以貫之言惟其根本如此是以能如此也下二句皆以可與貫之言惟其積功如是是以可與如是也進德字與至字相應居業字與存字相應進則必期所至居則欲其常存朱子言夫子繫辭最精密可玩味此類是也居上不驕在下不憂至

雖危无咎則進德修業成功之效驗也

九四君子進德脩業欲及時也

欲字可見樂則行之憂則違之之意非爲邪非

離羣便見確乎不拔之意莫非聖人事雖所處之位不同而處之道則無二致九四之位已逼君其進退之難尤甚於九三故或上或下非有心於爲邪或進或退非有意于離羣但看時之可否時之可進而上可退而下皆隨時之宜初無恒無常皆疑而不敢必之辭皆釋九四爻辭或字之義

君子學以聚之問以辯之寬以居之仁以行之

學聚問辯即進

德之事寬居仁行即居業之事前於九三言此復於九二言之所謂有隱顯而無淺深者此也

九三上不在天下不在田九四上不在天下不在田中

不在人

此一節申言危惕之義及或字之義于九四加中不在人一句可見九四地位視九三其進退

上下尤爲難處可見惟隨時順人指九三

䷁ 坤

元亨利牝馬之貞

程傳作四德說朱謂坤之德常減于乾之半其義爲密乾文言曰不言所

利大矣哉坤即言所利他卦皆然可見朱義密

六三象曰或從王事以時發也

程傳謂夫子懼人之守文而不達義也故從而

明之今詳爻辭或字已有此義言人臣之道雖當舍晦其章美而貞固守此然于王事當爲之時亦或可從又不可一守晦默無爲但不可有其成功以終王事則爲臣之道得矣象文以時字正釋或從字

上六龍戰于野其血玄黃

龍即乾卦六爻之龍也坤象不得稱龍稱龍戰者言陰與

陽敵也臣子之于君父妾婦之于其夫其盛已極勢與為敵浸生陵替不安其分呂武之禍滔天不可言又如唐太平安樂二公主斜封墨敕所謂疑于无陽也于野者出其分外之地也非常道也悖理犯分事必无成故致兩傷如呂武可見嫌于无陽此无字當與無獻子之家之無同謂不有之也謂其嫌于无陽故稱龍以明陽未常无如臣子雖有無君之心而君父之尊自若非所宜犯猶未離其類也故稱血焉血陰屬如臣子雖有犯分之舉而終名為臣子是未離其類也其血玄黃只是形容兩傷形狀不祥之徵其象如此凶不言可知聖人于陰極之爻發此義垂訓大矣。天地間一陰一陽相為消長循環不窮如剝卦剝于上則復于下純陽之月陰已生于下純陰之月陽生亦然未嘗无也自天道言之陰從陽坤承乾


常道也何可相无自人事言之小人盛極必生无君之心故聖人于坤上六爻特發此義其曰嫌于无陽嫌之一字可見聖人扶陽抑陰之意亦就人事上說

六二文言曰直方大不習无不利則不疑其所行也有固

之善安而行
之何疑之有

六三文言曰陰雖有美六五文言曰美在其中陰有陽錯綜然

後成文重陰獨陰安能成文六三陰爻陽位是陰中有陽故曰含章六五亦然故曰文在中也至上六則純陰之極故有嫌于无陽之戒陰雖有美陰含陽故稱有美重陰獨陰不可謂美六三猶未中六五陰居陽位又居中故曰美在其中而暢于四支比六三德為尤盛



屯

六三即鹿无虞惟入于林中

三以陰柔陷于一陰之中全无所見乃昏而不明之

象如入于深林之中左右前後皆无引導指示之人也○小象以禽字與窮字叶韻可見一東與侵字叶

詩綠衣風與心叶韓文盤谷歌深與容叶古人叶韻皆不苟

六四求婚媾

指求初九

往吉

指從九五凡退下爲來進上爲往

象曰求而往

明也

六四雖陰下有初九陽剛爲正應又近于九五陽剛之君故曰明六四之明可見六三以陰而復陷

陰中其昏暗宜矣卦爻有兩利建侯指一陽在下當建立

爲侯以能匡濟

䷃ 蒙

彖初筮告

二指九

再三瀆

指初三四羣陰有瀆蒙之象六居四以陰居陰承乘應又皆陰

无開發之者其困甚矣蒙六四之才位與屯六三同而蒙六四爲甚故爻辭直言困吝而不言所以

象曰山下出泉蒙君子以果行育德

山突立于前有不

有漸涵浸漬之象君子觀山之象當涵泳其德使優游厭飲不爲他物所移觀泉之象當涵泳其德使優游厭飲

然後爲有得

初六利用刑人用說桎梏以往吝

初六之蒙人之始犯于罪由其心蒙昧未

審于令非故犯者治之道當寬猛相濟使恩威並行則民易徙若專用刑往而不知反則下無完民是

可吝也夫刑非得已而用者用刑以發其蒙正欲使民有知不犯而脫其桎梏亦刑期無刑之意

九二包蒙吉納婦吉子克家

陽則明陰則蒙以一陽而統御羣陰故曰包蒙以陽

剛而應與皆陰故又曰納婦以剛中之才在下而任在上陰柔之事又如賢子能幹父母之蠱无往而不得吉也

六四困蒙吝象曰困蒙之吝獨遠實也

陽爲實陰爲虛六四陷二陰之

中故曰遠實蒙六四之困亦屯六三之入林

六五童蒙吉

已之才不足而能信任賢才吉孰大焉太甲成王任伊周而致治童蒙之吉也自古

人君蒙闇未有如劉禪者能信任孔明而蜀大治况其他乎

需

需待也以剛健之才遇險陷在前當容忍待時用柔而主靜若不度時勢恃剛忿躁而驟進取敗亡必矣初九去險尚遠以用恒免咎九二漸近險小有言亦以用柔守中而終吉九三已迫于險象復發其義言敬慎不敗六四已傷于險以柔而不競能出自穴故象曰順以聽也上六險陷之極入于穴无可出之理亦以能敬終吉然則需待之時能含忍守敬皆可以免禍需之時義大矣漢楚之爭漢王之傷于血者屢矣鴻門之屈已漢中之受封趣印王齊皆以柔忍須待而終得吉子房平時蓋有得于筮前之占矣出自穴程傳以穴為物之所安朱義以穴為坎陷朱說為密

上六不當位

當字當平聲

訟

序卦飲食必有訟詩云民之失德乾餱以愆此飲食爭訟所由起也

不利涉大川

凡卦辭遇坎有大川之象遇乾剛有利涉之理需乾下坎上乾剛上進故利涉訟坎


下乾上乾坎違行故不利涉

九二象曰自下訟上患至掇也

爻辭本无此意夫子特發明此義以垂訓言在

下之人當守分不可訟上若不安分則禍患如掇拾然掇如摘花拾芥之屬言最易也昔有里人爲吏欲訟其本官吏得此爻予戒之曰據此占此事切不可作作則必自取凶禍其人不信終訟不已卒至亡家喪身聖人垂訓爲萬世之寶不可不信從也凡坎卦中實爲有孚之象需訟二卦二體皆中實故

文皆言有孚但需卦乾內坎外而爲需乃陽剛之才待時而動必至光顯亨通訟卦坎內乾外而成訟未能亨通必窒塞危惕又必得中而後吉也險健始成訟險剛而行剛以險患故六爻質稟居柔皆得吉上九居訟終不言凶者爻辭意謂縱便訟勝尚无所得况有不勝其所喪多矣或者設戒如此暫得之辭



師

六五田有禽利執言長子師師弟子輿尸

程傳訓衆主朱義訓撓敗

師徒恐二說皆可兼存言命將出師而又以小人參之則必致敗軍但訓作衆主則與長子師師爲反對其義尤切執言程傳訓奉辭伐罪朱義因上文田有禽訓爲搏執以言字爲語辭恐程說爲密况後世義兵之舉皆曰仗義執言豈不明甚又案田有禽恐當時卦爻中必有此象當細觀之此卦上坤爲土又

以全體觀之本爲純坤而一陽來居二爻乾卦九二曰見龍在田以六爻上下而言則二爻正當田位陽動物也爲動物來入于田爲田有禽之象禽在山林固無事于獵取今入于田則害我禾稼政而執之宜也猶蠻夷猾夏寇賊姦宄當奉辭聲罪以致討長子帥師可也又以弟子衆主之是自取凶咎也長子指九二弟子指三四皆陰柔小人也或弟或子非一之辭本不宜用乃在上之人以親信之故而以偏愛信任之喪敗誰咎乎



比

不寧方來後夫凶

常不寧之時必求其可爲依歸者而往依之務在速決而勿懷猶豫湯之

湯誥武之武成當時諸侯豈有後至者乎夫程傳謂強立之稱朱語錄引左傳前夫後夫爲證恐皆不必

如此說但男子皆可稱夫下至庶民上至邦君皆可通稱左氏華元曰夫其口衆我寡指築城民也如漢祖龍興時良平信等杖策來歸曷嘗敢後又如光武時竇融舉國內附豈非不寧方來而得吉如隗囂輩降既晚尋復叛逆卒致亡滅後夫凶之謂矣

象曰地上有水比先王以建萬國親諸侯

師大象曰地中有水師君

子以容民畜衆地中有水與地上有水象頗相近容民畜衆與建國親侯義亦相類但地中有水未免有淵潛之象故容民畜衆氣象亦差狹小地上有水則如江河淮海其象顯著廣大故建萬國親諸侯氣象極廣大非容民畜衆之可比。凡卦有卦德坎險卦德也自屯蒙至此凡六卦皆有坎體彖辭皆以險明其義屯曰動乎險中震坎二卦德也蒙曰山下有險險而止蒙坎艮二德也需曰險在前也剛健而不陷乾坎二德也

訟曰上剛下險險而健訟坎乾二德也師曰行險而順坎坤二德至此卦坤下坎上獨不言險者一陽居九五為君位而衆陰順從之為聖明在上億兆歸附萬國咸寧之象險字不容言也 又如蹇曰險在前

也見險而能止知矣哉坎艮二德也需險在前剛健而不陷故為需蹇亦險在前既非剛健之才見險而能止亦可以為智困曰險以說兌坎二德也節曰說以行險坎兌二德也凡彖辭例先以卦德釋卦名義然後徐解彖文又如井渙有坎體而彖辭不言險者并以養民難以語險渙散之時亦不可言險既濟未濟皆有坎而亦不言險者既濟剛柔皆當位未濟三陽皆失位此義尤大故略險而不言也朱子謂夫子所繫之辭最精密此類可見舉此一卦之德而論則八卦之德可以類而推矣

初六象曰比之初六有他吉也

案爻辭有孚凡兩更端及盈缶等語象辭皆畧

之直舉初六為言可見比之要道在乎始先始則心有誠後則非誠心又辭意謂初六之比有孚已得无咎况其孚誠又充實而不尚文飾則其終又當有他吉也有他者出其望外之謂也此義與卦辭後夫凶之意相發明

六三象曰比之匪人不亦傷乎

自天子至于庶人未有不擇交而能安其身者

子曰因不失其親亦可宗也况當不寧之時尤宜慎擇馬援見光武曰此時不惟君擇臣臣亦擇君此之謂也六三陰柔之才而承乘應皆陰所交皆小人安能久而不變春秋之時有朝相盟而暮相攻伐者豈非不亦傷乎之義乎

九五

小象中與禽又相叶

上六比之无首无所終也

即卦辭後夫凶之義



小畜

小畜以一陰而畜止五陽陰先于陽終非正道故不和无雨故初九復自道象曰其義

吉也九二牽復吉象曰亦不自失也九三以陽比于陰便得夫妻反目之象其凶可知六四又以巽順而得无咎至九五居尊位而羣陽從之乃有畜以其鄰之象吉不言可知至上九則為畜之終陰陽和而雨宜若吉矣乃為之戒曰月幾望君子征凶其警懼之意益深可見聖人扶陽抑陰之意明甚易為君子謀不為小人謀也

象曰有孚攣如不獨富也

此乃仁者散財以得民之象蓋一陰畜止五陽為君子受

制於小人之時一有君子在上能散已財博施濟眾則眾心歸之必得行其志願其吉可知程傳釋鄰為

五陽朱義以鄰為四上二爻恐程說為長泰六四曰
不富以其鄰陽實陰虛實則富虛則不富自古雖聖
賢豪傑欲舉事必先積財穀然後可動大衆如乃積
乃倉爰方啓行之類可見故此二卦二爻之文義富
以其鄰事必克濟不富以其鄰事必无成吉凶不必
言也。又如謙六五亦曰不富以其鄰以象而言皆
陰爻乃言不富以卦德而論則謙德非泰卦小畜可
比直如湯以七十里文王以百里方可以當之德盛
為衆心所歸富不
富又不足言也

三履

履虎尾不咥人亨

此上當脫一履字非卦名履虎尾三字乃是占辭分一字作卦名不成文

理卦之所以得名為履者以柔履剛故也剛履柔常
事不言柔履剛不常故言可見聖人好陽而惡陰也

然以卦德而言說而應乎乾以是道而行則雖履危地而不至傷害也程傳曰履踐也藉也以柔而履藉於剛故為履殊覺費力縱然如此說履帝位而不疚作履藉說全不通矣朱義謂和說以躡剛強之後亦是踐履之義後又見朱子語錄云伊川云履藉說得生受則當時朱子亦已致疑今徐而觀之只是詳玩彖辭文義甚明白平易何用巧說不知程子當時何故主此說程子在日易傳未嘗輕示人常藏在書篋中言俟我長一年見識進一步所見又別及至屬續之時然後出授門弟子恐此等說或猶是未定之論也故

初九素履往无咎

一陽在下上無應與為賢才處下上不聞知之象但素其位而行不願乎

其外故象曰
獨行願也

九二履道坦坦幽人貞吉

以陽而居中處柔上無應與為賢人在否守分樂道之象

其所行坦蕩心廣體胖不求聞達者故象曰中不自亂也初二二陽爻頗相類皆以上无應故志在守其素分不思進取若有應而志有所係則不安素願而中心亂矣

六三眇能視跛能履履虎尾咥人凶武人為于大君

眇本

不能視而自謂能視跛本不能履而自謂能履乃昏庸之才剛愎自用所行皆危陷凶毒之事居臣位而攘竊國柄不良之狀不可殫述故象辭條陳而析解之又一例也

九四履虎尾愬愬終吉

四正當虎尾之象本為危地但以志柔故恐懼而得終吉人能

常存戒懼雖危亦免咎也

九五夬履貞厲

以剛居剛正當君位率意而行无所疑忌下无應與又為人臣無匡濟之道有

媚說之象語曰予無樂乎為君惟其言而莫予違也詩曰具曰予聖誰知烏之雌雄正當此爻之義以是

而行鮮不危矣

䷊ 泰

六四翩翩不富以其鄰不戒以孚象曰翩翩不富皆失

實也不戒以孚中心願也

四以陰居柔為小人居大臣之位之象三陽上進其勢強

盛將不可遏小人固位貪祿之心恐其奪已所有故率其黨類協謀拒之故有翩翩不富以其鄰之象翩翩疾貌三陰相連為鄰象其志同故雖不告戒而自有期信故象曰中心願也然小人失衆心故曰不富

雖翩翩疾起中心同欲終必无成此爻辭與小畜九五爻義參看方有味二爻皆不言吉凶而事有成敗則吉凶存焉富與不富異而能以其鄰則同如春秋書齊桓會諸侯同盟於幽之類傳者曰書同盟志同欲也齊桓之同盟同輔王室為美後如晉會諸侯於平丘之類同病楚也伯業衰矣亦書同盟傳者曰欲為善者同為善欲為惡者同為惡與二卦二爻皆曰以其鄰之義相表裏



否

六二大人否亨象曰不亂羣也

二居二陰之中上應九五陽剛之君終不陷于

小人之黨此爻與復卦六四中行獨復爻義相似

九五休否大人吉其亡其亡繫于苞桑

九五雖有陽剛中正之才足以

休否然當否之時不可不深致其戒故曰其亡乎其亡乎彼小人之固結猶似苞桑然不可輕易視之也其者疑辭如其然豈其然之其恐小人之易進而難退否道之易成而難亡唐五王討武氏之亂而不并去武三思後悔無及豈非不知苞桑之戒乎○泰否二卦陰陽消長恰相似彖辭亦只平解至六爻當陰盛處必為君子思患豫防計陰消時即不言之聖人之情見矣

䷌ 同人

初九象曰出門同人又誰咎也

未出門之前初无心於同人及既出門之後遇

道同志合者則與之同道不合者則敬而遠之理義勝其私心又何過咎之有

六二同人于宗吝

不顧賢否是非而惟族黨是與此乃比而不周同而不和私心勝而理義

亡是可
羞吝也

九三伏戎于莽升其高陵三歲不興

九三以弱敵強以
下攻上以逆犯順

理勢皆不宜積三歲之久而不改由其志剛故也故
象曰安行也謂莫若安分而行之為愈言縱久而終

必无
成也

九四乘其墉弗克攻吉

四與三其始无甚異但四居柔
乘墉之時犯非其分力又非敵

若不息必至於困此所謂知難而退者故得吉也春
秋晉納邾子于邾弗克納春秋美之正與此爻同義
但晉納邾子非力不能直以
非義而不敢其事為尤美

䷆ 大有

九二大車以載有攸往无咎

大有之時驕則生非心奢則耗其財不能常保其富

有若在上之人當天下富庶之日恃其富強妄生事端或肆意宮室苑囿或開邊拓境遠事四夷以致海內虛耗者有之當是之時必得上有善政然後庶民得以安享其所有九二以陽剛中正之才為六五柔順之君所倚任衆陽之所同歸蓋上下皆賴以為安者由其弘毅之才足以任重而道遠大車以載任重也有攸往者道遠也故象曰積中不败也不敗者无咎之謂也



謙

六十四卦六爻吉凶悔吝皆不能无如乾德最盛上九亦有悔惟謙卦六爻皆吉可見聖人至德莫有盛於謙者克之允恭克讓舜之溫恭禹之不矜不伐湯之儉身若不及文王徽柔懿恭望道如未之見吾夫


子出言輒曰君子之道四丘未能一焉君子道者三
我無能焉皆自謙也今之學者有隻能片善便自矜
伐盍觀前聖行哉○益贊于禹曰滿招
損謙受益時乃天道謙之義原於此



九四由豫大有得勿疑朋盍簪

九四以一陽貫於五陰之中上下五陰似髮四

有橫簪聚髮之象蓋大臣居近君之位天下安危皆
萃於一己之身當以身任天下之重不必疑慮若以
小嫌懷疑有所顧慮則天下或不得其安樂矣若伊
尹之阿衡周公之四國是道太甲之不惠成王之疑
伊周固有所不暇恤惟盡己之忠誠而已此所以能
成天下之豫樂也



動而說隨

程傳謂說而動動而說皆隨之義朱子語錄云但當言動而說不當言說而動凡卦體卦

德皆從內說出去又曰動而說成隨巽而止成蠱朱說良是

象曰澤中有雷隨君子以嚮晦入宴息

程傳曰雷藏澤中澤隨以動故

君子觀象隨時而動晝則自強夜則宴息朱義曰雷藏澤中隨時休息語錄又曰既曰雷動何不曰君子以動作乃雷入地中之象雷隨時藏伏故君子亦隨時休息朱義為密

䷐ 蠱

程傳釋蠱之義固已詳備朱義云蠱者前人已壞之緒此一語極是明切且諸爻義皆切當巽而止所以成蠱非治蠱也如卦之才有大善乃所以治蠱也利涉大川治蠱之道當備歷險阻艱難先甲後甲治蠱

者當新其始而預慮其終此乃卦義諸爻義皆含此意

象曰君子以振民育德

蠱之時壞已極矣治蠱之道當思有以振作興起其民一新其

耳目而聳人之視聽可也康誥曰作新民之謂然必已德无疵然後可以新民苟已德未至雖欲民之興起民將不己從也

初六幹父之蠱有子考无咎厲終吉

初六居下而承上之事有子父之象

前人之緒已壞後人承之當研精極慮釐革舊弊一新制作然後可以振興一代之業如周宣王承厲王之後漢宣帝承武昭之後孔明治蜀承劉璋之後寬則濟之以猛不避難乃可謂之有子考得无咎厲終吉即利涉大川先甲後甲意

九二幹母之蠱不可貞

九二以陽剛而承六五之陰柔有母子之象但戒以不可貞則

與幹父小異然以巽順而得中道亦善幹蠱者也

九三幹父之蠱小有悔无大咎

九三以過剛未免小有悔能盡己之才非柔緩

无所事者故终无咎

六四裕父之蠱往見吝

六四以陰居柔當蠱之時以寬濟寬苟且目前之小康不慮將

來之敗潰如漢唐季世執國柄者循習故常積之既久遂致壞爛而不可復救裕蠱往見吝之謂也

六五幹父之蠱用譽

五雖陰柔能用賢以治蠱最為善繼者也故有令譽○凡卦六爻皆

隨時取義或有爻義與卦義相表裏者蠱之類是也



臨

九二象曰咸臨吉无不利未順命也

未字疑衍命正理也九二以剛中而應六

五中正之君順乎正理以是而臨民宜无不利




觀

上九觀其生君子无咎象曰觀其生志未平也

上九懷才抱藝

而處无位之地其道德器望為衆人所瞻仰夫君子之生斯世也欲行其道於天下所謂樂則行之乃其本志也既不得位道不能行則自省其身言行德業不愧君子之名則雖不得行其道於當時而亦可以淑來世所謂憂則違之也故象曰志未平也若孔孟是也



噬嗑

是卦之義譬之為治則強梗不服之人必除去然後其道可行梗化有大小之不同則除之自有難易之別若舜誅四凶周公伐淮奄何難之有若漢祖之除項王則所謂遇毒見傷者屢矣然義在必除雖或見傷義終无咎故四爻中噬有難易而終非凶吝也○初九與上九罪有大小之殊故刑之之法亦有屢校荷校滅趾滅耳之等噬膚噬臍噬肺噬肉有難易則其時其人所遇不同終得吉而无咎蓋當噬而合之故也若光武之於囂述太宗之於充竇亦可謂艱貞矣未有如漢高之噬膚也



賁

小利有攸往

質本也文末也質體也文用也故質大而文小剛柔質也惟其相交是以成文无本

不立无文不行故
曰小利有攸往

象曰山下有火賁君子以明庶政无敢折獄

明庶政離明之用也

无敢折獄艮
止之不用也

初九賁其趾舍車而徒

初居下故有賁趾之象趾在人
身最居下舍車而徒善處賁不

過于浮華而得宜故
象贊之曰義弗乘也

六二賁其須

六以二居中故有賁須之象須在趾之上
頭面之下須於人身无損益於軀體但可

為儀表之飾周旋揖讓進退低昂皆隨面貌而動使
人儀舉者文采容止可觀皆由於須故象亦贊曰從
也上興

六三賁如濡如永貞吉

三居文明之極與二皆因剛柔交錯而成文賁之盛者也然又

恐其交之過故又戒以常得正則吉夫人質朴而不文故多致陵忽苟有威儀則儼然人望而敬之故象亦贊曰終莫之陵也言人不敢侮也乘興陵古人用韻不苟

六四賁如皤如白馬翰如匪寇婚媾

四已過中且為艮體將止其賁不敢

過於文反尚質素故人馬皆白且志應初九若不為九三所間則與初合以成其素志

六五賁于丘園束帛戔戔吝終吉

此又義只從舊說為平易六五以陰柔居

尊位不能自成其賁反求上九之才以施其文治若可羞吝然能尊賢貴德以黼黻文章其治化亦足謂之賢矣故終吉

上九白賁无咎

上九處无位之地高尚其事不尚華飾以質素為賁甘受和白受采其賢於五

采彰施
遠矣

六五上九

皆敦尚質素以白為賁素以為絢之意莊子云虛室生白白終貴於間色○小畜象君子

以懿文德大畜象君子多識前言往行以畜其德分
明以威儀文辭為小以忠信德行為大彖辭言小利
有攸往小字指文而言忠信為
本禮奢寧儉自然有小大之分

䷖ 剥

上一畫陽如牀板蓋之狀下五陰列兩邊
如牀足之狀故諸爻象多取剥牀為象

䷗ 復

剥復二卦爻程朱二
夫子傳義厥旨微矣

䷖ 无妄

彖辭不利有攸往初二二爻皆以有往吉語若相悖
而意實相發明蓋惟无所往而後有所往若先有所
往即為妄而不可行矣

六二象曰不耕穫未富也


言非有意於求利益也用天
之道因地之利自然而然夫

豈計利而為之哉苟先有計利
之心即妄矣富者利益之謂也

䷊ 大畜

卦名大畜非謂畜乾小畜亦畜乾但小畜以一陰而
畜五陽又以巽順而止不能力制故名小畜大畜則

以二陰而畜四陽能以力制故名大畜此小大之別
觀小畜初二二陽爻皆以上進而得吉大畜初二
陽爻皆以不進為利又彖辭不曰
健而止而曰能止健分別可見



頤

觀頤自求口實

口實者已出入之物也此指言語飲食
也彖辭釋曰觀頤觀其所養也自求口

實觀其自養也其義甚明所養兼人已而言口實自
養專指己身天地養萬物聖人養賢以及萬民亦只
是推廣觀
頤之義

象曰君子以慎言語節飲食

頤口象也夫子以六字盡
蓋其義慎言語防妄出也

節飲食防妄入也妄入則生疾能害其身妄出則興
患必喪其德人能守口如瓶言語不妄出飲食不妄

入佩服六字惟謹則一生享用有不窮者矣

六四顛頤吉虎視眈眈其欲逐逐无咎

予嘗讀是爻傳義釋虎視眈眈

其欲逐逐二句終不可曉後見朱子語錄亦有自不滿足之義於是反覆繹思頗得一說今具於后○凡人物之嗜欲莫甚於得食以養生大臣任天下之重其所願欲亦莫甚於求天下之賢俊以養民虎食六畜之肉以養其生而六畜非常供之物不可以易得為虎之計必須抖擻精神專意伺察以求外至之畜然後取而食之庶可以飽其所欲相逐而不絕稍或安然自肆不用明察則六畜深藏遠避虎不得食且饑而死矣大臣資天下之賢俊以養民而良才碩德韜光晦迹高蹈丘園不可以易致為大臣者必當明目達聰搜羅延聘然後得而用之庶可以遂其所願相繼而不窮苟或弛然怠惰不加諮訪則在野有遺

賢在位有曠職民不得其養而咎歸於己矣虎踞巖石之上而其志在於食六畜之肉故其日常耽耽然下視而望遠未嘗少瞑大臣居百司之上而其志在於求在野之賢故其日常瞭瞭然旁思而遠索未嘗少怠其象相類故爻辭借譬以覆解顛頤吉之義顛倒也以下而仰望於上為順以上而反望於下為顛此據爻象而言非不美之稱故直謂之吉也周公一飯三吐哺一沐三握髮以待天下之賢士所謂虎視眈眈也耽耽目睛光耀貌賢才悉用於當時利澤永垂於後世所謂其欲逐逐也如周公之聖尚如此况六四之陰柔乎四句只是一意若如傳說虎視作立威嚴其欲又作一義文意似不粘綴又頤卦正是食物養生之義虎食彼之肉盆己之欲以養生大臣取彼之才盆己之才以養民其文意甚簡明且於頤卦義為切○顛頤吉六四居上而求在下陽剛之賢以賴其養位雖顛倒其義則吉也六四求賢之心誠能

如虎之用其明下視眈眈然其心常在於外求則其欲可逐逐而來養民之職稱矣又何咎責之有但如此解。又案荀九家艮為虎六四艮體有虎踞巖下之象。眈案韻會此眈字從目從允說文云視近而志遠也以此證此爻義益明白本作眈从耳者非


䷛ 大過

上六過涉滅頂凶无咎

上六以陰柔居人上當大過之時不自度己而好為過高難行之

之事不知深則厲淺則揭不知隨宜進退乃至過涉以沒其身此乃暴虎馮河死而無悔者自取之也又奚咎焉。大抵大過之時已難得中若堯舜禪讓湯武征伐固不可以常見君子於在己之可為者只有獨立不懼遯世无悶為過入而又得中舍此之外欲求為過人之行必流於異端索隱行怪矣據六爻而

論九二之老夫女妻雖稍賢於九五之老婦士夫然已非庸行之謹九四之棟隆雖頗安於九三之棟橈然又戒於有他之吝上六過涉不足言也獨初六以藉用白茅得免于咎然則夫人當大過之時惟守其素分庶乎其可免也○无咎象曰不可咎也程傳以爲小入自取禍又將奚尤朱義以殺身成仁當之且以東漢黨錮諸人爲證遇以爲殺身成仁如比干之死合乎天理之正若黨錮諸公不能言遜以取禍過而失中何足取也當從程傳爲是



坎

習坎有孚維心亨行有尚

此彖辭上當脫一坎字作卦名伏羲畫卦時只是單坎字

及文王繫彖辭然後謂之習坎夫子之繫辭始釋曰習坎重險也若不加一坎字在上似以習坎爲卦名

八卦中何曾有習坎卦

水流而不盈

此一句專釋坎字之義蓋惟不盈是以為坎陷而險若盈則平流通而達矣何坎陷

之有故九五曰坎不盈祇既平无咎盈科而後進之謂也

離


元亨利貞四者自有先後之序他卦皆然惟離卦先利貞亨雖傳義有說終未詳

咸

咸以通體而觀以坤之虛納乾之實

恒

上經首乾坤下經首咸恒天地者萬物之父母以全體而言純乾純坤對峙於上有天地父母之象乾交坤乾入坤中坤包乾外有夫婦消嗣之象又繫辭云天地定位山澤通氣雷風相薄水火不相射八卦相錯此先天八卦方位也乾坤生六子八卦相交錯然後成六十四卦今觀上經首乾坤天地定位是也終坎離水火不相射是也下經首咸恒山澤通氣雷風相薄是也終既濟未濟亦是水火不相射也○乾坤二卦有文言咸恒二卦夫子贊咸恒之義與他卦頗殊○咸象曰君子以虛受人蓋惟心中无物故通而不塞物至隨感而應若先有物則靈塞而不通焉能有所感應乎○恒小象用東侵韻叶



遯

初六象曰遯尾之厲不往何災也

小人道長之時君子當退藏以避之遯之

道以遠為貴如鳳鳥高翥爵祿不得廉增繳不能及
古今遯者未有若管寧適遼東正所謂肥遯无不利
既不能遠則必為小人所染又曰不往何災何也蓋
去則情迹皆見彼小人者惡其異己必以其所行相
汙染寧能免乎不能遠去莫若遂不往彼小入者既
不我虞亦不違忤故可沉晦以免患若寧武子之愚
是也及其終也亦能免小人之災則與嘉遯肥遯同
一歸也但有肥厲之異耳蓋所遇其時其地自有不
同此六爻皆君子之事
有夷險而无淺深也

䷗ 大壯

象曰君子以非禮勿履

凡過於剛勇惟施於克己則可施於他事皆不可也

九三小人用壯君子用罔

罔无也小入無忌憚故肆其壯而不顧君子而時中則視

其壯若无而不用也此君子小人之别也若如傳義說君子與小人相去不遠下文羝羊觸藩羸其角皆小人用壯之象也易中言君子小人皆以陽剛與陰柔對言乃善惡之分若所謂君子有勇而無義為亂小人有勇而無義為盜此以位言恐非此爻之義



初六晉如摧如貞吉罔孚裕无咎

初六以柔順居下當進之時本非躁進者

故既進而又若有摧抑之者蓋君子難進之象如此然當進之時故為之戒曰貞吉恐其汲汲求進而失正耳非六之才不足於此也罔孚裕无咎又以盡上文之義故小象贊之曰獨行正也又曰未受命也孟子曰我無官守我無言責也則吾進退豈不綽綽然有餘裕哉正此謂也

六二晉如愁如貞吉受茲介福于其王母

六二以中正和順之德遇

文明之君在上必求其進六二不以為喜反以為愁蓋志于功名富貴者則以進為喜以行道濟時為心者則以為憂任大責重故也當進之時勢不可止故亦以貞吉為戒然與六五同德同氣相求不能不進既得君而澤加于民必受重祿於其上始之愁先天下而憂後受福後天下而樂其憂其樂皆无預於己也。初六六二皆有貞吉之戒皆非其不足初六尚可遲可速六二則有不容已者故終必得祿所居之位不同也

六五失得勿恤

程傳謂人君委用天下之才不當自用明察朱義以為非愚謂文王罔攸兼於

庶言庶獄庶慎又曰文王罔敢知于茲恐亦是程傳之意

䷗ 明夷

六四入于左腹獲明夷之心于出門庭

此又義程朱說大異詳初二二

爻君子於行用極馬壯等語與此爻于出門庭語相類似朱義近是又意竊意入于左腹者人心屬左故曰左腹四居大臣之位猶不忍去及至見暗主之心終不開悟故不得已而亦出耳不如初六六二去之決而速也直至如六五則居至親至近之地不可得去非如箕子之守正鮮有不受禍者

䷤ 家人

象曰風自火出家人君子以言有物而行有恒

言有物言有誠

信也誠者物之終始不誠則無物恒者常久而不變也言有誠實行可常久治家之本孰過于此

九三家人嗃嗃悔厲吉婦子嘻嘻終吝

嗃嗃案韻書釋嚴也獨引易文

為證想他經傳無之若以會意求之字從口當是切切然責問聒聒不停之意家人家長主家事者一家之事各有職掌未有徒食而無其事者如農圃不治則責諸奴紡績不修則問之婢以至倉庾耗庫藏缺若弟若子各有任其事者皆所當責問也既以事不理而受責宜有悔而心不安然既受責問則必恪共乃職所職既修則和睦如故所以終得吉也若婦子嘻嘻惟務笑樂不思治事雖一時懽悅及至怠荒不及修整其終羞吝甚矣然則嚴切者和樂之本安恬者悔吝之基武侯承劉璋闇弱柔緩之後用法尚嚴蜀大治其言曰政寬則民慢慢則加之以猛猛則民殘殘則施之以恩恩威並施寬猛相濟政之善也治家猶治國歟

睽

九二遇主于巷九四遇元夫六三象曰无初有終遇剛

也


剛柔相應乃易中大義惟睽卦不然程子曰睽離之時陰陽相應之道衰剛柔相戾之意勝故初九與九

四乃以同德相遇二與五為正應亦曰遇不惟爻辭而小象釋九三亦曰遇剛六三與上九本陰陽正應若依他卦凡例當云應剛而亦依爻辭曰遇剛案春秋書法盟會則有嘉禮不能備禮則書遇蓋當人心乖離之時患難急遽之際相求相合不過欲宛轉曲成其事在禮雖苟簡而於情則甚切至是道也其項伯子房鴻門之遇與孔明請適吳見孫將軍之時乎


上九象曰羣疑亡也

羣疑指上文豕負塗鬼一車張弧匪寇之類昔人見弓影疑蛇得疾

再見是弓疾愈是也



見險而知止曰蹇故彖稱之知矣哉
遇險而止不能進曰蒙若童稚然



利西南无所往其來復吉有攸往夙吉

案无所往三字一句非卦辭原

經文乃後人釋利西南一句言難解之後但利於平易之地他无所往也後世傳說遂誤寫入經文中何以知之无所往與有攸往正相反不應一卦辭中疊出一也若果作无所往之義如傳義所釋之吉亦當作勿用有攸往或云不利有攸往不應作无所往无所往一句非文王時文法文王時語典重簡質至夫子時文辭始敷暢據六十四卦爻辭中无此等句法二也凡彖辭釋卦辭句句字字有著落精密詳明无

一字不釋豈有一句全不釋者知其非原卦辭必矣
三也大意謂難解之後但置民於簡易之地不當更
有作為惟復先王之舊政而已其間或有大節當更
改者亦宜及時蚤與更定不可延滯以擾民也。姑
以武王武成之書証之利西南如歸馬放牛之類以
示民不復有所往也其來復吉如反商政政由舊是
也有攸往夙吉如列爵惟五以下等
事皆克商之後即舉行不待他日也

彖曰利西南往得衆也

程傳曰不言无所往者省文爾
此小象之例彖辭無省文例

六三負且乘致寇至

當難解之時正思擇賢居位以安
民六三以陰柔居民上身尚不能

自安何能安民師上九
小人勿用此義互相發

三損

益

損益二卦本因損下益上損上益下而得名益名美損名不美然損六爻多善益六爻不甚善書曰滿招損謙受益時乃天道蓋人自滿是惡德也故招損滿為體質損其應也今以損為體質由損道而行宜多善事謙吉德也故受益謙為體質益其應也今以益為體質無益上加益之理以求益而行安能盡善○損益二字就人身而言損莫先於克去己私益莫大於進德修業貧富貴賤所不論也○損益二字正相反損彼則益此損此則益彼此盈則彼虛此虛則彼盈未有盡善盡美者惟所謂弗損益之无損於己有益於人乃為盡善如教民節儉使省減浮華敦尚質朴則民生益厚教民禮義使革去舊染日新厥德則民德益崇凡若此類皆可謂之弗損益之然此非賢才不能故於損卦惟九二上九二爻凡兩見乃損道

之至善非陰柔所能初九
曰酌損之亦是稍含此意

六三三人行則損一人一人行則得其友

莊子曰易以道陰陽繫辭

曰一陰一陽之謂道聖人難於此爻發此義其實一書之樞紐也

上九弗損益之无咎貞吉利有攸往得臣无家

爻辭幾于卦辭

故象特舉而贊之意亦可見相敵可見損道之至善

象曰風雷益君子以見善則遷有過則改

風雷相益迅速不遲君子

法之見善則即遷知過必速改不可猶豫聖人有此意

六三益之用凶事无咎有孚中行告公用圭

當損上益下之時六


三居民上當用此道以益民必用凶事者孔子曰君
子周急不繼富孟子曰樂歲粒米狼戾多取之而不
為虐詩云嗇矣富人哀此鰥獨則是豐年樂歲富家
巨室何用益之凶事謂貧弱細民鰥寡孤獨及凶年
饑歲民有餓殍此類乃凶事也正宜開倉廩以賑貧
乏補不足助不給是也為民上者所當行何咎之有
六三居剛志剛恐其自任非誠心故戒以宜有誠心
又合中道然後可告公而通其誠心也若齊之田氏
以公量入以私量出豈非損上益下之事但其志欲
收人心以圖篡奪豈有孚中行乎其咎大矣若孟子
告齊王發棠以賑民正所謂
益之用凶事有孚中行也

六四中行告公從利用為依遷國

中行告公承六三上
文而言不言有孚者

四居柔志柔無自任之失故不言也言遷國者凶事
又莫大於此也如太王遷岐公劉遷邠盤庚遷殷棄

己之成業而遠徙於未立室家之地勞其心力損上甚矣欲與下民圖永久之安後益莫大焉依安也于京斯依之依二爻皆言告公不及王者王公降殺只一等告公則必達於王也。六三小象固有之也謂職分所當為也六四小象以益志也言以益下為心也。三四皆不中故皆有中行之戒



夬

象曰君子以施祿及下居德則忌

居如懋遷有無化居之居猶積也德猶既

所以德之德謂惠澤也忌疾也在上之人散財穀以調給於民乃在上之德惠也觀夬之象當散其所有以及民若居積其德惠而不散則在下之義民皆疾惡之矣下一句覆解上一句之義

上六无號終有凶

易為君子謀不為小人謀詳味此爻若如傳義說似為小人謀恐只依卦

辭乎號有厲之意言雖是五陽決去一陰尚存且居五陽之上為君子之計當顯揚於衆若有危急之勢以決去之苟或默然養禍則其終必致凶患唐五王不去武三思卒為所殺於此又理義絕相類。如月幾望君子征凶等語皆為君子謀彖辭曰利有攸往剛長乃終也可見聖人之情欲小人盡化為君子何嘗慮小人有凶也但如此說



姤


爻取包魚包爪
未審有何取象



萃


初六有孚不終乃亂乃萃若號一握為笑勿恤往无咎

一握指三陰也朋友相握手之義昔闕張與先主交忠誠貫日月後先主得孔明每共語二人不悅先主曰孤之有孔明猶魚之有水二人始不復言闕張尚然況常人乎且其若號則為笑也



象曰君子以順德積小以高大

傳依卦象坤有順德說意甚是本義未詳



九二困于酒食朱紱方來利用亨祀征凶无咎

九二與九五同

德必相求但當困時只宜固守中德不可作為躁動求進晦養俟時故曰困於酒食言他无作為但飲食以養生而待需卦亦以飲食明待時之義九二朱紱指五九五赤紱指二皆言享祭蓋二五皆中實有孚

誠之象故皆以祭祀言也。○升萃二卦言用禴亦在二爻既濟言禴祭亦在五爻。○彖不釋无咎二字吉之義可以包无咎也。○當是脱无咎二字

井

彖辭不言无喪无得往來井井二句亦當作脱文蓋卦義大語簡質而義理包括无窮故彖辭釋卦義詳明不略復加推行理益无盡間有一二卦或一二句不言皆當作脱誤非是省文爻義小故小象或舉一語以包其餘或舉急而略緩或舉大以包小故有省文也

革

九四一爻當革之時為最盛乾文言曰乾道乃革蓋內卦已成外卦始畫又重卦之初其時其位正宜革

也



象曰君子以正位凝命

正位端莊在位也凝聚也象鼎中之實也烹飪美味謂和聚於

鼎腹法之亦聚其理
義於心命正理也

九三鼎耳革其行塞雉膏不食方雨虧悔終吉

陰陽二爻在鼎

卦中當作水火者二者備然後可烹飪闕一則不成
烹飪初與四二與五皆陰陽相應水火既濟惟九三
與上九皆陽而不應故有耳革行塞不食之象然三
有才而巽順九五明君必來求故又有方雨虧悔終
吉之象悔亡无悔悔盡亡而无也虧悔者
悔本有必虧之而後无用力艱難之辭也



震

六二震來厲億喪貝躋于九陵勿逐七日得

億度也不億不信之

億事未至未著而先謀度之謂億與不億不信字義同言反顧而懼其來預度其勢不敵必喪吾所有但常遠避不可與爭過則自復也

六五震往來厲億

句

无喪

句

有事

句

億者知二陽之進及其未至而先事

謀度其所以待之之道也无喪者度其在已居中而履君位守中德而无失則亦未至於失位也有事者惟事事乃其有備有備無患重門擊柝以待暴客古之制也二陽相繼而進皆可謂之暴客也若夫修車馬備器械詰爾戎兵不忘儆懼莫非事也二陽之進又度其勢之輕重緩急若何亦隨其輕重以待之五

君位也四與初臣位如其至未敢輕犯或可喻以守
分則惡者可化為善梗者可變為惇或凶逆不悛則
我有禦侮之具大則誅夷小則貶竄皆可得无喪也
六五爻象占辭與六二大同小異二言來厲五言往
來厲二反顧只一陽五內顧有二陽陽性上進皆能
至此是前者既往而後者復來也故先事而度之雖
不至於失位亦必有所事億先事預度也喪失位也
二言喪貝指所有之資寶也五不言所喪謂失位也
言雖無所失亦不忘所事所事謂常存恐懼警戒之
意而勿失在己之中總也五之危象重於二而占辭
反輕者五君位非二可比況先事而知警備雖剛暴
之來亦未敢輕犯理勢然也但細玩象辭可見○六
二震來厲指初九一陽在下震動而來可為危懼六
五震往來厲只多九四一陽為前往其餘三字與六
二同爻象甚分
明何用別說

象曰震往來厲危行也其事在中大无喪也

二內顧只一陽故曰

乘剛也雖億喪貝惟遠避候既過則勿逐自復五下視有二陽先者既過而後者續來視二為甚危故曰危行也王者居中而保治五有中德凡備禦之方皆合中道而无過不及之愆圖度施為莫助之者惟自幹運於由衷皆所謂其事在中也大无喪者聖人之大寶曰位故莫大於君位富有四海土地之廣人民之衆皆欲保全而不失所謂大无喪也視六二喪貝誠小大之不侔矣細玩象辭其義益明○當震動之時柔中之君能盡中道以保其位亦可謂善知震之道也

上六震索索視矍矍征凶震不于其躬于其鄰无咎昏

媾有言

鄰指五震之來先五而後及六可以預圖而免咎




震九四遂泥艮九三薰心大抵陽陷陰中多不吉況此二爻以一陽陷四陰之中何能得吉震九四遂泥躁於進而不知所之艮九三薰心局於止而不知進退○震以先動為可驚艮以終止為敦篤諸爻皆舍此意○六五象中正或作正中

彖曰上下敵應不相與也

八純卦皆然獨於艮卦發者惟其無應與故止也他卦義

不相涉言各有當也



九三鴻漸于陸夫征不復婦孕不育凶利禦寇

此卦六爻皆取

象於鴻者鴻之為鳥固知時有序寒來暑往則自北
以漸而之南寒往暑來則由南以漸而之北其進以
漸未嘗驟至故取以為象也由初六自干而磐而桷
而陵而遠皆以漸進而獲安惟九三進于陸而不安
陸乃人所經行之路鴻進至此宜不安九三剛而不
中又居止之極乃人之剛愎自任昏愚不移不知遷
善者既無正應又昵比於六四而與之合猶夫婦不
以正道而苟合也夫而苟合必不能反於善道婦而
苟合必无孕嗣之理其凶宜矣至六四爻辭乃或得
其桷无咎何也夫主家者也夫既正奚患婦之不正
夫不能自正則夫倡而婦隨之奚責婦之為故聖人
責夫而不責婦於小畜九三六四亦然九三輿說輶
夫妻反目小象曰夫妻反目不能正室也此責夫而
不責婦也程傳曰三自為也朱子本義不解只引程
子之言皆責夫而不責婦也恒六五象曰婦人貞吉
從一而終也夫子制義從婦凶也家人上九象曰威

如之吉反身之謂也莫非責夫之意是乃人倫之大義正家之要道因是而詳辯焉

上九鴻漸于陸其羽可用為儀吉

達雲路也羽喻所行也有儀而可象之謂

儀法則也鴻飛布空如書字然可觀而不可亂干磐
稱陵人皆可及至於雲路猶天之不可階而升此喻
賢達之高致人仰望而不可及
但取其所以為法則而已

䷵ 歸妹

九二眇能視幽人之貞

二有賢德而配不良惟居幽
守正而已衛莊姜不見答於

莊公其詩曰我思古人
俾無訖兮此爻頗相似

䷶ 豐

卦有涉刑獄者四皆有離明噬嗑賁豐旅是也舜命
皋陶曰惟明克允刑獄人命所係苟不明慎則枉濫
者多矣

䷷ 旅

初六旅瑣瑣斯其所取災

陰柔處于卑下旅困之時上有正應而不見恤取災宜也

黎侯寓衛日久不見救援其詩曰瑣兮尾兮流離之子及魯昭公寓于乾侯正此義也

六二旅即次懷其資得童僕貞

六二柔順中正又艮體止而得中則得其所止

資在內指初六童僕在外指九三蓋能得內外之助旅寓之時雖非安宅然聖賢亦有不免管寧客於公孫度先主寓於劉表或益崇其德或卒遂其志亦在乎善處何如耳

九四旅于處得其資斧我心不快

凡卦爻陽剛皆勝陰柔惟旅卦不然二五

皆以柔順得吉三上皆以陽剛致凶蓋人無棲身之地不得已而依于他人豈得恃其剛明管寧適遼東戒王烈勿用明察此深識時勢者六爻六五最善二次之上九最凶三次之九四雖得其處始足以安其身而已以剛明之才欲設施事業豈得盡遂其志劉玄德客荊州髀肉不消未免泣下正所謂我心不快也

六五射雉一矢亡終以譽命

六五有文明中順之德而上下與之故當旅時雖暫

有小失而終遂其大慶晉亡人旅於諸侯雖辱於野人逼於曹而終反國成伯業正所謂亡一矢而終得譽命由其輔佐皆賢才而无失德故也六二六五二爻晉重耳似之

巽

九二巽在牀下

凡卦中如黃牛金矢釋中順剛直之類分明繫辭本意若此卦九二上九兩言

巽在牀下只是卑諂之甚何用貼說昔小人極其卑諂之態如所謂鼠伏蠅屈佞辭泉湧與巽在牀下迴巽牀亦有牀象上二陽畫象牀板下一陰象牀足

九三頻巽吝

復六三頻復厲无咎巽九三頻巽吝巽雖良德與復不同復乃遷善改過之謂雖頻

其義无咎恭近於禮乃遠恥辱足恭則取羞吝

兌

彖曰說以先民民忘其勞說以犯難民忘其死說之大

民勸矣哉

說雖吉德亦不宜過若過說施之君臣則流于諂媚施于父子兄弟亦忘其諫諍施之夫

婦則溺于私昵施之朋友則為善柔便辟而非責善皆不可惟施于民則无不可民過說則政治益隆民益說則邦基彌固或曰朋友不可過說象辭乃以朋友講習言何也以講明理義為說可也以交接相說不可也○兌說也人當喜說之時剛則有節柔則无度故此卦初二及四五六皆以剛陽而得吉三上二爻皆以陰柔而致凶來兌者以和說求媚于人流蕩忘反之人其凶宜也六三居一體之上其凶如此上九居重卦之上又說之終是說而又說終不知止其凶當甚于六三而不言凶者恐引兌下脫一凶咎悔吝等字或云亦有不言凶而凶可知如小畜九三與說輶夫妻反目因初六臂困于株木入于幽谷三歲不覿如此類占具象中雖不言凶而凶已見非引兌之比也



渙

渙散也其義有當散者有不可散者在人身而言氣鬱結而不散則成疾發散而為汗則氣舒而體平私欲窒塞則害德散之則性融而天理流行在政治而言則可收合而不可散莫若人心萃人心莫如宗廟祭祀得人心莫如散居積以濟民故卦爻辭義皆具此意

六四渙其羣元吉渙有丘匪夷所思

六四居大臣之正位上輔九五中正

之君當離散之時能使其民羣聚而不散誠大善而吉然其事須是渙其有丘丘聚也在上之歛積如丘山之高大仁者散財以得民不如是不可以合人心如武王散鹿臺之財發鉅橋之粟是也常人之情孰不謂積財以充國用而賢人高識則曰百姓足君孰與不足此非平常之人思慮所能及也

九五渙汗其大號渙王居无咎

言人心離散之時人君常布其號令以新天下

之耳目竦其視聽使浹洽于人心然必散王者之居積以與民始可以得其心不然未免有過咎六四之元吉亦歸之九五九五之渙王居亦不出六四之渙有丘程傳言四五爻義通言之已舍此意但有丘王居之說各異耳。利涉大川風行水上舟楫濟川便利之象

五經蠡測卷一

欽定四庫全書

五經蠡測卷二

明 蔣悌生 撰

尚書

大禹謨

后克艱厥后臣克艱厥臣政乃乂黎民敏德

傳曰乃者難辭也敏

速也亦易辭也言君臣能各勤其職而不敢有一毫
忽易之心然後庶政可得而治至於下民觀感而化
則上行下效表正
影隨甚不難矣

稽于衆舍己從人不虐無告不廢困窮

心無己私而仁智兼盡惟聖者能之惟狃於己私故
好自用而仁智鮮及惟聖人無我故能舍己之私見
而從人之善言也鰥寡孤獨民之無告者撫之使得
其養此仁之至困窮之士不能自拔者舉之使盡其
才此智之盡

充舉舜于側微正
不廢困窮之大目

人心惟危道心惟微惟精惟一允執厥中

理氣之稟出於天而殊分知行之學盡於己而同歸
此聖學相傳之心法也

人稟天地之氣以成形而有
耳目鼻口之欲所謂人心也

稟天地之理以為性而具仁義禮智之善所謂道心也人心感物斯生情肆益熾故危而不可持道心無形與聲不可見聞故微而不易求惟聖人先知先覺欲立教以示人使之察其微而使著制其危而就不安也惟精者審察夫人心道心之所以異能擇之而不差故謂之精即大學所謂格物致知中庸所謂擇善明善孟子所謂盡心知性知之事也惟一者既知夫至理之所在則必力行以求至使人心聽命於道心而不二故謂之一即大學所謂誠意正心修身中庸所謂固執誠身孟子所謂存心養性行之事也中者無過不及之名知之至行之盡使人心發見之頃必使道心常為之主而不踰於本然之則即所謂執中也

也在大學則為止至善在中庸則為中在周子則謂之太極湯之建中武王之建極皆一理也堯舜禹湯文武周公孔子顏曾思孟道統之傳傳此而已大學所謂明明德明此而已中庸所謂修道之教修此而

已論語開卷言學學此而已孟子開卷嚴義利之分
正所以辯人心道心之源故朱子於四書篇首集注
其旨大同小異實與此章相表裏讀者當融會而貫
通之不可以差殊觀○此章乃一書之樞紐蔡傳全
用朱子中庸章句序訓釋乃朱子曾經訂正無餘蘊
矣今日課講義正不欲全蹈襲前人語必主其說而
演繹發明之庶幾得
融會貫通之趣云

臯陶謨

知人則哲能官人安民則惠黎民懷之

有智仁之實斯有智仁之效仁且智聖人之德也然
體備於己而用施於人惟實德之備於己者有兼至

則效驗之著於人自有不可揜者知人謂之哲者智之至則其用之所施能舉天下之賢而任官使矣安民謂之惠者仁之至則其用之所及能入人心而不能忘矣哲也惠也智仁之實德也官人也民懷也智仁之效驗也二者兼盡帝堯猶難況其下乎

亦行有九德亦言其人有德乃言曰載采采

此言天下之言善者雖非一端而人之稱善者必考其實行此帝世取人之法也

日宣三德夙夜浚明有家日嚴祇敬六德亮采有邦

此言人才生於聖人之世既因其材而篤之則亦隨

其材而用之也

日宣日嚴祇敬因其材而篤之也浚明有家亮采有邦隨其材而用之也

無教逸欲有邦兢兢業業一日二日萬幾無曠庶官天

工人其代之

此章言人君當正己以率下固慮夫事之萌於微者

為可畏人君當盡心於求賢尤思夫職之原於天者

不敢忽蓋人君一身所以表正萬邦而天下之事固

宜廣求賢才以共治之也是故克勤克儉君當以身
先之使諸侯有所則效不可怠惰放肆以導之所以
然者蓋以一日二日之間事幾之來且至萬焉何可
以不懼也若夫庶職之繁不能以獨治當旁求俊彥
以共理之不可使野有遺賢而朝有曠職所以然者
誠以百官庶事皆曰天職君臣皆代天理物者也一
職或曠則獲戾於天矣其敢忽而不敬乎始之無教
而制一己之私終之無曠而合天人之理人君正己

用人之道於斯備矣

益稷

予乘四載隨山刊木暨益奏庶鮮食予決九川距四海
濬畎澮距川暨稷播奏庶艱食鮮食

聖人於治水之初親執其勞而所以濟民急者既有
其助聖人施治水之功能順其序而所以養民生者
尤得其人蓋斯民之得遂其安養者皆由於聖人治
水之功而一時同功共事之臣各有所長則於叙功

之時初不沒其善也

仲虺之誥

式商受命用爽厥師

蔡傳云爽明也言天使商受命用使昭明其衆庶也今詳上下文義

恐不然只是指夏而言爽如不爽之爽差失之謂言天不善夏之所行故使商受命以代夏使失其衆也如此解與下文簡賢附勢文意相屬

惟王不邇聲色不殖貨利德懋懋官功懋懋賞用人惟己改過不吝克寬克仁彰信兆民

此章言成湯之德性不偏好故賢能之任不混所施

心無私繫故君德之及感人者深人惟牽於物欲之私故行事鮮能盡善惟聖人無私是以從政臨民莫不合於當然之則也聲色貨利常人所嗜好也湯則不邇不殖天性之不偏也賢者授之以官能者酬之以賞各適其宜也人之有善若己有之用之而不疑己之有過勇於自克改之而不憚心公而無私繫也寬仁君德之大端也寬則得衆仁則能愛人推此以及人民信而德顯矣蓋其心之不偏無我者出治之

根本彰信於兆民者德政之效驗也惟其存於中者
醇粹而無疵則見諸外者泛應而曲當有諸己者光
輝而篤實則孚於人者顯著而周徧論聖人之德亦
可謂備矣去讒遠色賤貨而貴德所以勸賢矜
伐自用則賢能不為用民豈能信乎
佑賢輔德顯忠遂良兼弱攻昧取亂侮亡推亡固存邦
乃其昌

此章言王者於善善惡惡之科各因其自然之理而
施之初非有意於其間也蓋賞罰者人主之大柄也

好善而惡惡天下之同情也人君惟能舉措得義則人心服而大業由以盛矣賢德忠良之人在彼有可好之實故我從而佑輔顯遂之弱昧亂亡之人在彼有可惡之理故我從而兼攻取侮之聖人曷嘗有私好惡哉因其有可好可惡隨物應之乃自然之理也於己何與焉此人心之所以服邦國所由昌也

賢者才德

兼備德未必有才賢重於德也忠者盡心事君良者行己易直忠重於良也所謂由大以及小也弱者不能自振昧者不明於理亂者紀綱廢壞亡者逆天反常亂亡重於弱昧也所謂由小以及大也推者革而

去之之謂固者殖而厚之之謂篇末言殖有禮即佑輔顯遂之事覆昏暴即兼攻取侮之事仲虺何屢言之蓋湯征自葛始其後韋顧既伐及昆吾夏桀十一征而有天下皆兼攻取侮也其餘五等邦君非黨惡者皆仍舊封湯皆撫而有之湯之慚正在於此故仲虺言此乃應天順人之事非己之私所以釋湯之慚湯誕告萬方凡我造邦一節即賢德忠良之諸侯仍舊封者湯復諭之戒其為不善勸其為善即仲虺之意也○佑助也有加爵賞之意輔者扶植之顯者表其名遂者即其舊四字亦自有重輕

王懋昭大德建中于民以義制事以禮制心

此章言聖人明明德於天下而庶民同一歸極聖人能全天命之性而內外兼有所養也蓋禮義者人性

之所同得惟聖人為能全之是以立中正以為民表而人心有同然者於是取則焉則會極歸極有不期然而然者矣德也中也義也禮也一理也自人性而言故曰禮義自其稟於天而得於己而言故謂之德以表立於此而四方取正而言故謂之中其實一理而已大學言明明德於天下者皆以修身為本而其要在於誠意正心舜執其兩端用其中於民而本諸身者曰由仁義行武王建其有極而民之會極歸極

則曰遵王之道遵王之義誠以仁義禮智乃人性所
固有但衆人汨於私欲而亡之聖人則能明其德而
全之是以存心養性以立其大本窮理處事以達其
大用立中正之表以為民準使之皆有所取正而無
過不及之差所謂明德新民而止於至善者大舜湯
武其揆一也顧諟天之明命日新又新懋昭大德也
孟子曰湯執中即建中於民也以義制事義以方外
也以禮制心敬以直內也由乎中以應乎外制於外

所以養其中懋昭大德在是建中于民亦不外是矣

湯誥

天命弗僭賁若草木

言天命不差賁然易見如草木然
栽者培之傾者覆之皆因其自然

之理而付之初無意用力也罪人黜伏傾者覆
之也兆民允殖栽者培之也如此解似有理

凡我造邦無從匪彝無即怙淫各守爾典以承天休

此章乃成湯革命之後布維新之命以與天下更始

亦不越乎懲勸二端而已

無從匪彝無即怙淫懲其
為惡各守爾典以承天休

勸其為善典即彝也謂先王舊章也怙淫以情欲而
言人能禁止其一己之私無怙淫之失則能守其典

常而不從非常之舉矣造邦繫之我建侯之令
自天子出守典繫之爾述職乃諸侯之常事

太甲上

詩書小序前已詳言之矣今案四代之書史氏紀載
每篇首史臣已有本序典謨語簡重本序亦略提大
綱篇中君臣問答語意自明白可尋如五子之歌伊
訓篇首本序極詳悉何用小序贅出至太甲篇首言
惟嗣王不惠于阿衡伊尹作書一跋畢復更端又言
王惟庸罔念聞伊尹乃言又一跋畢又言王未克變

及居桐悔悟篇終又言王祖桐宮居憂克終允德以
終首篇之意而發次篇之言皆史氏之辭以貫紀載
一篇之意既詳且明故曰書小序可以無此類可見
後多倣此

自周有終相亦惟終

自周二字對嗣王看則自字分明指先王之身周如周于德之周完

密而無罅隙之謂言夏之先王自省其身無罅隙之
可議故能有始有終相亦蒙君之及亦能有終見得
君重於相使太甲知自謹不可恃伊尹而縱
欲如此語意自順不必引國語施氏之言

王惟庸罔念聞

庸訓用作六字一句為是

先王昧爽丕顯坐以待旦旁求俊彥啓迪後人

丕大顯明也詳

文意只是言成湯急於求賢為子孫計故於未明以至於大明之時往往坐以待旦其所以勤勞不遑安寢者惟欲廣求賢俊以開導後人也如前篇敷求哲人俾輔於爾後嗣之意蓋先王圖治之道為後世慮固非一端然莫急于求賢如堯舜之仁不徧愛人急親賢也丕顯二字下無所繫若訓為洗濯澡雪大明其德恐語意不倫太甲三篇皆文從字順不應二字如此艱澁

若虞機張往省括于度則釋欽厥止率乃祖攸行

此數語專

為發明止字之義止者必至於是不遷之意即至善之所在也不可有毫髮之過亦不可有毫髮之不及過不及則非所止矣凡物莫不各有所當止之地如括之度射之止也君之仁臣之敬子之孝父之慈

人之止也虞人之於射尚知審其括之合於度然後發矢況人君可不慎求其所止之地而後行乎蓋伊尹以虞人審射之的明人君敬身之要也省字喻欽字度字喻止字釋字喻行字欽者敬之至也欽厥止敬之於心率乃祖攸行見諸行事惟能敬求其所止然後見諸行事而無失欲其見諸行事而無失又莫若近法乃祖之所行為易守蓋乃祖之所行又皆得其所止而止之之事也

予弗狎于弗順

詳文意及事理乃伊尹自言我不能狎習於不順義理之人是以有桐宮之舉

此正可見伊尹有任底意思若依蔡傳所解則弗字下欠一使字所謂不順義理之人正指太甲也伊尹既訓之不惠於阿衡又作書訓之又庸罔念聞又訓之王未克變再三訓誨而不改故承上文而言予弗狎于弗順文意明甚

孟子集注正如此解

太甲下

與治同道罔不興與亂同事罔不亡

治而謂之道者指理義之當行者而

言如三綱五常天叙天秩禮樂制度之類皆是也亂而謂之事者指人情所作爲者而言聲色犬馬賦歛威虐之類是也蔡傳損益二字莫若作因革則天敘天秩皆在其中

咸有一德

其難其慎惟和惟一

其難其慎嚴之於未任之前惟和一惟一信之於既任之後非難非慎

則所任或非其人非和非一則賢者亦不肯爲用其者不易決之辭惟者不可易之義孟子曰國君進賢如不得已此其難其慎之謂

盤庚上

盤庚遷于殷民不適有居率籲衆咸出矢言曰我王來
既爰宅于茲重我民無盡劉不能胥匡以生卜稽曰其

如台

率者民相率也曰者民之誓言也我王民稱盤庚也此一節乃史臣述盤庚將遷殷民不從出怨懟

之辭如此也言盤庚將遷都於殷民不肯往居相率號呼衆皆愁感而出誓言曰自我王即位以來既定

居於此矣方愛民非害民也今乃不能相正以生乃稽之於卜曰無如我民何此皆民之怨言其意若曰

自始至今既安居久矣今乃無故信卜筮無根之言而造此非常之舉動寧不使我民流離轉徙以害其

乎生

先王有服恪謹天命茲猶不常寧不常厥邑于今五邦
今不承于古罔知天之斷命矧曰其克從先王之烈若
顛木之有由蘖天其永我命于茲新邑紹復先王之大
業底綏四方

凡六十三字錯簡當在無傲從康之下

盤庚敷于民由乃在位以常舊服正法度曰無或敢伏
小人之攸箴王命衆悉至于庭

此錯簡當在其如台之下承上文民有怨言盤

庚乃出敎令以諭衆令各從其在位之人以來勿以遷都為異常之事但以尋常舊日所行正法度之事視之可也蓋以舊日法度在下臣民必順上所行無在下各執私見之理大意謂今日之事各宜洗心滌

慮盡其情實不可有先入之私見或有細民言有可
悉毋得過之使不得上達議論詳悉則遷都利害必
有至當不易之論故王命臣民衆庶悉至於庭以聽
王之號令也此等語正是篇首發端語不應在底綏

四方

王若曰格汝衆予告汝訓汝猷黜乃心無傲從康

此錯簡當

在先王有服之上此以下乃盤庚誥臣民之辭黜乃
心無傲從康乃一篇之大旨其下云云皆所以釋二
句之意○如蔡傳所解率額衆感出矢言作盤庚之
言但此句繫於民不適有居之下作盤庚言恐語意
不順我王作盤庚稱祖乙恐非嗣王稱先王之體既
言先王有服至底綏四方許多告諭復言盤庚毀于
民王若曰于下恐錯亂無序非誥臣民之體况王命
衆悉至于庭然後告諭衆未至又告戒何人中篇首

言誕告用賁其有衆咸造勿褻在王庭盤庚乃登進厥民正與上篇盤庚數于民一節數語文勢相似乃

史臣發端語錯簡明甚

先王有服

此一節大意言不遷都之害

若顛木之有由蘖

此一節言遷都之利

古我先王亦惟圖任舊人共政王播告之修不匿厥指王用丕欽罔有逸言民用丕變今汝聒聒起信險膚予

弗知乃所訟

此一節言先王之時君令臣從同心一體今汝造為浮言不息起信傾危淺見之人

以沮遷都之謀我不知汝之心有不平何謂乎訟者心不平也

含德

言其不盡情實包藏於心如上文伏小人之箴匿厥指之類

觀火

視火之然也火始然則當

撲滅之不可坐視其然至於燎原則不可救矣今我聞汝浮言不急治汝是我拙謀長汝之過亦猶坐視

火之然而轉熾也

汝不和吉言于百姓惟汝自生毒乃敗禍姦宄以自災
于厥身乃既先惡于民乃奉其恫汝悔身何及相時愴
民猶胥顧于箴言其發有逸口矧予制乃短長之命汝
曷弗告朕而胥動以浮言恐沈于衆若火之燎于原不
可嚮邇其猶可撲滅則惟爾衆自作弗靖非予有咎

汝言

不諧叶善言於民是汝自生毒害自取敗禍姦究于
身導民為惡自承其痛雖悔何追小民之言有不從
之者尚有口過况我為君能制汝死命汝何敢不稟
命於我而輒造浮言以扇動民心乎汝之所為若此
恐必至於陷溺其衆庶也若火之始然蚤當撲滅若
至燎原則不可嚮其尚可撲滅乎喻浮言蚤當禁止
若復縱至於沮謀害成則必加
刑罰是汝自取之非我之過也

邦之不臧惟予一人有佚罰

佚如淫佚之佚過也言邦之不臧皆由汝浮言之所

致我必重罰汝也邦之臧惟汝衆申結用德彰厥善之意邦之不臧惟予一人有佚罰申結用罪伐厥死之意所謂佚罰即伐死之義也故篇終復斷之曰罰及爾身弗可悔

人惟求舊器非求舊維新

盤庚引遲任之言意謂國有大事必求世臣大家與之謀

者以其與國同休戚故也器非求舊惟新者舊則敝壞新則完固耿之圯亦猶器之舊遷于殷亦猶求新也器

盤庚中

罔不惟民之承

承字有三義承載承奉承順人君一人

勢言庶民出賦稅以供上用出力以供上役此以形言所以承奉其君上令下從風行草偃不敢有違此以理言所以承順其君此三義皆可通何必訓為敬下文承汝俾汝義同

恐人倚乃身迂乃心

言浮言之惑人能使陷於邪僻而不及於中正涉於迂遠而不切於

情事

茲予有亂政同位

亂政指具貝玉造浮言之人不必訓作治字具即下篇總字之義

盤庚下

朕不肩好貨敢恭生生○無總于貨寶生生自庸

當時大家

世族有田祿沃饒之利故安土重遷造為浮言以沮遷都之謀夫專一己之利必不恤於民生盤庚三篇大意在此中篇既以具乃貝玉與往哉生生折言之至終篇遂以好貨與生生對言而申言之以明遷都乃上下生生不窮之利不遷則世臣之利而小民之害也○今案上篇乃盤庚始有遷都之謀世臣不利故造浮言以惑衆愚民無知怨咨竊起不肯遷盤庚乃出教令大意皆責在位之人多示嚴刑以威之中篇則臣民已遵教令浮言已息遷都有期臨行告諭之辭大意皆諭民庶在位既從下民如風行草偃不

必示以威惟慮塗中有寇攘竊發故特嚴刑以禁之下篇則既遷殷上下奠居勞事已過將享安業故統諭之皆撫綏之意上篇威多於恩中篇恩威並行下篇施威崇恩此盤庚三篇之殊義也。又案篇內如不乃等語乃一時方言先儒謂周誥殷盤詰曲聲牙今觀周誥尤甚于殷盤蓋篇中語多是一時方言加以有錯簡脫誤是以難解未免以意逆志而後可通耳

說命上

說桀傳巖之野

桀作版桀之義為是

王置諸其左右

師其學也愚嘗曰高宗之於傅說學焉而後臣之故不勞而治

若金用汝作礪若濟巨川用汝作舟楫若歲大旱用汝

作霖雨

三者皆資其輔益之義金作礪一器之小者望其朝夕有切磋琢磨之功使己德日修而至於

成器濟川舟楫望其急難相濟則澤及乎人矣大旱作霖則澤及天下如天地之功用非人力所可及所

謂一節深於一節者此也

啓乃心沃朕心

蔡傳厭飲二字莫若浹洽為佳

若藥弗瞑眩

期說之極言

若跣弗視地

勉己之慎行

欽予時命其惟有終

此二句總結上文言能敬我所命之語則庶其為有終也

說命中

惟天聰明惟聖時憲惟臣欽若惟民從乂

天言聰明不加一語天道

無為不待贊也聖言時憲人君當法天行事與天為一不可異也臣言欽若當敬順其君之所為敬順其君即所以敬順乎天不敢忽也君之時憲臣之欽若皆非易事至於民之從乂則不勞而治矣此四句與大禹謨后克艱厥后臣克艱厥臣政乃乂黎民敏德四語大旨相同此雖不言克艱而君臣交相責難之意皆在其中矣○自惟天聰明至事神則難乃傳說畫一以告高宗也每句以惟之一語發其更端各主一事而言蔡傳分為九節今觀第一節蔡言為君為臣之難第二節蔡言人君賞善罰惡之要第三節蔡言用君子棄小人之道此三節統言其大綱慮善以動之下枚舉其細目蓋亦莫非修己治人之良法黷於祭祀亦是舉一節而言蔡傳未辨高宗彤日非高宗之祭故以此為因其失而正之恐非是

王忱不艱允協于先王成德

言王誠能為信力行而不以為難則信合先王之成

德若作亦不為難
案下文頗不順

高宗彤日

嘗觀祖己訓王之辭激切如許乃忠臣告昏主之言
竊疑高宗踐阼之始夢帝得說此乃歷古亘今罕有
之事自非誠心與天無間何以得此蓋非凡主不應
暮年昏耄如許又若為高宗時事篇首但當稱王不
當稱廟號則為嗣王之書無疑蓋祖庚彤祭高宗之
廟而有此異故祖己作書訓王也又案商王皆以十

日干為王號獨中宗高宗既以太戊武丁號又以宗稱蓋以宗稱者皆歿世之後定其諡號見其盛德大功非他王可比故以宗稱始為不祧之廟必無晚歲失德之理周公作無逸以中宗高宗與文王並稱其賢可見今見鄒氏音釋已如此說當從鄒說為是

西伯戡黎

祖伊恐奔告于王

蔡傳謂自其邑奔走來告紂未審何所據竊疑臣朝君必有其節祖伊開

西伯戡黎知其必及殷故憂切之甚不暇待朝覲之時而直奔告於王耳

不虞天性

蔡傳謂民失常心也今案三句皆言天之棄紂未及言民民字恐未穩但曰心失揆度也

猶上無道揆之意

牧誓

昏棄厥遺王父母弟不廸

遺餘也蔡傳欠此三字

洪範

貌曰恭言曰從視曰明聽曰聰思曰睿恭作肅從作乂

明作哲聰作謀睿作聖

恭從明聰睿謂之曰者五事各有本然之則不可以加損也肅

乂哲謀聖謂之曰作德之成就猶賴進修之功也恭而作肅則動容貌斯遠暴慢矣從而作乂則事有條

卷二
理而不亂矣明而作哲則知之至而於天下之理無所
疑聰而作謀則慮之審而於天下之事無所謬此四
德之用施於外者然也至於心之官則思專主於內
思通乎微則其妙用神化不測有莫知其所以然者
有以兼統四德非若貌言視聽之司各主一事而不
能以相通內外交修大小兼養人道踐形之學至此
備矣

五皇極皇建其有極

天地有自然之數聖人有當然之理天地有中數而
不得聖人則中數無以行聖人有極理而不本於天
則中數何以立因天地自然之數而建當然之極斯

可以爲法於天下矣

天一地二天三地四天五地六天七地八天九地十天數五地數五

此自然之數也數始於參天而兩地合參兩而成五又爲天地自然之數也五行生成之序由天一生水至天五生土土黃色居中則五居中又天地自然之數也天五生土地十成之以五乘十則十五者又天地自然之數也洛書之數五居中而四正四隅九一三七二八六四皆因五以爲十五此九疇之位以五居中而繫以皇極之疇亦猶易卦六爻以五爲君位也天以太極之理默運於亭毒之表而陰陽五行寒暑迭運庶類繁殖品物流形聖人體天之道居中建極而四方五服庶民庶類咸有取正會極同歸一理而已八疇之目皇極無所不該八疇之事皇極無所不總

凡厥庶民有猷有爲有守汝則念之不協于極不罹于

咎皇則受之而康而色曰予攸好德汝則錫之福時人

斯其惟皇之極

此言皇極之施於庶民者也人才之生於世大率有是三等皇極之施各因其

材而篤之亦有三等康色好德最賢者也錫之福尊以爵也有猷有為有守皆有能者也念之者敘而用之也不協于極不罹于咎又其次庸才也受者收也收入於鄉黨之官而教以六行蓋皇極之道中也養不中才也養不才以是皇極無棄民也有是三品之才而皇極亦有三等之施各得其道是以此時之人皆得其皇極之歸矣末一句乃總結上文三節之義

人之有能有為使羞其行而邦其昌凡厥正人既富方穀汝弗能使有好于而家時人斯其韋于其無好德汝

雖錫之福其作汝用咎

此言皇極之施於在位者也此一節與上一節對言民有此三

品人亦有此二品有能為即上文有猷有為有守之人有才者也正人乃居官守正之人有德者即上文所謂好德者也不必作庶官之長說不協于極不罹于咎此一等庸人此一節不言者此等未習教之人言之於民則可言之在位則不容在位有此之人故略之也於有能為言蓋行昌邦正人言既需方殺互文以並見爾非能為不與富正人不昌邦也昌邦以事業言殺善也以德化言所包尤廣也時人斯其幸亦兼上二者而言但有才任事有德在位之人皆當優以祿使有所瞻若使有仰事俯畜之憂則此等之人終陷於罪非謂正人必待富而後為善蓋忠信重祿所以勸士乃先王治天下之大經皇極之道當然不必謂中人以上皆可能上一節言皇極之於人當用君子民舉善而教不能下一節言皇極之於人當用君子

去小人王者治天下之大端亦不出此二事于其無
好德汝雖錫之福其作汝用咎亦通結上章之意深
言用小人之害
所謂法外意也

無虐瑩獨而畏高明

此二句本在人_之有能之上今詳
文意疑當在此亦錯簡爾蓋通結

上一節之義言皇極既以是道而待天下之民人則
天下之民人莫不囿於皇極範圍之內而無有或遺
者矣然期在於必行勿以小民易虐而茹柔則過於
中勿以尊貴可畏而吐剛則不及於中若是則淫朋
比德並作而皇極倚於一偏而不立矣惟威福之用
執其中而不失然後天下民之去其偏陂好惡之私
循其遵義遵道之正由乎坦坦蕩蕩之塗達夫公平
正大之域舉一世咸歸于極而皇極之道成矣二句
移在此所以承上二
章而起下章之義

凡厥庶民極之敷言是訓是行以近天子之光曰天子

作民父母以為天下王

此皇極之成其效驗若此故居五疇之終光者道德之光華天

子之光豈天下民庶所易近所可近者天子道德之光華也禮樂制度頒於四方徧於臣民巍然煥然有昭昭然在人心目而不可掩者莫非道德之光華也民生日用之間用其禮樂遵其法度雖謂之近天子之光可也積之之久民皆復其本然之善樂其日用之常有男女居室之安無疾疫憂患之危皞皞然熙熙然不覺懽欣鼓舞歌咏太平而親戴其上有一德書曰俾自已者此王道之成皇極之極功咸有一德書曰俾萬姓咸曰大哉王言又曰一哉王心蓋治化之極恩德入人深自能致此堯民擊壤自是實事理勢必至

惟辟作福惟辟作威惟辟玉食臣無有作福作威玉食

臣之有作福作威玉食其害于而家凶于而國人用創

頗僻民用僭忒

嘗觀九疇之目惟皇極一疇數言詳悉蓋八疇之目皇極為綱其事無不該其

用無不總不詳言而敷衍其理非一言所能盡也其他八疇但略言本疇之事不他及也如初一五行始

言目次言性終言味止矣次二五事始言敘次言德終言用亦止矣次三八政次四五紀只言目不言用

二疇之用易見不待言也次九福極只言目無他辭蓋其失得係極之建不建訓之行不行亦無他言也

惟次七稽疑次八庶徵此二疇數言頗詳然皆不離其本疇之旨如七稽疑始以擇人為先次言卜五占

二之目又次言卜筮吉凶之用辭雖繁皆釋稽疑之旨八庶徵始言雨暘燠寒風五者之目次言時敘備

無之吉凶又次言時恒休咎之微由乎五事之修不修又次言君臣之省驗辭雖繁亦皆釋庶徵之旨無

緣此二節凡四十八字繫於剛克柔克之下蔡傳雖
依本文平解然與上文意終不貫蔡傳又以威福予
奪抑揚進退釋剛柔之用蓋見經文有威福二字故
以為解又見二字未能盡剛克柔克之義故復增六
字以足其意借使可解然三德之目曰正直剛柔而
已其用則平康得其一剛柔得其四下文若更演繹
不應絕無正直剛柔等字而專論威福之當否歷觀
九疇之經其言潔淨明暢易曉不應此二節上屬正
直則柔語晦而意遠若此又况平康正直乃聖人無
為而治之本心而剛克柔克不得已而用之豈應下
文敷衍舍去正直而專釋剛柔之用亦恐非箕子明
疇之初意也愚昔讀此致疑而未喻近歲反覆詳味
蓋亦有年疑終未釋忽思莫非皇極之數言而誤在
此因詳此二節與上文正直剛柔之語不相蒙而與
民無有淫朋人無有比德之語相類遂定以為錯簡
當在惟皇作極之下凡厥庶民有猷之上今試以易

置錯簡解之願與明是經者詳加訂正可也。此承上文言民之所以無淫朋人之所以無比德者以惟皇作極之故也。蓋威福乃人君御天下之大權極之建訓之行亦由人君能執威福之柄以號令天下受四方之供奉亦不為過。凡此皆惟皇建極之所當為其權不可以下移其臣不得以上僭苟或有下移上僭之失則大而諸侯小而大夫皆致凶害為臣者側頗僻為民者僭忒皆有偏陂好惡之私不由平平蕩蕩之道而極不建訓不行矣。側頗僻必至於淫朋僭忒尤甚於比德側頗僻僭忒五者凶德與下文偏頗好惡偏黨反側字相應害于而家凶于而國亦與下文而邦其昌好于而家語相應如此解庶幾字字明潔語意流暢文脉貫通視他疇經文語亦無乖異矣更詳之

八庶徵曰雨曰暘曰燠曰寒曰風曰時

此十五字當為一節言五者之

來各得其時乃天地本然之氣候苟或一不得其時則人事之不修而天地之變也雨暘燠寒屬水火木金而風屬土者雨暘燠寒皆有風猶土寄旺於四時非若四者之不能以相通也

五者來備各以其敘庶草蕃廡一極備凶一極無凶

此五

句當共作一節解言五者皆備各以時至亦不過多亦不過少則人事修天道得其常故庶草蕃廡休徵所致吉或一過多一過少則人事不修天道失其常咎徵所致凶庶草蕃廡植類皆茂盛百穀亦在其中此言天地本然之氣候天地無心而成化不擇物而滋潤故泛言庶草蕃廡後言王卿士師尹省驗始及民事為急故專言百穀此聚言天道常變後乃詳言五事休咎之徵而後及省驗而天人感應之道備矣庶民惟星星有好風星有好雨日月之行則有冬有夏

月之從星則以風雨

蔡傳備矣更加一節云星雖有風雨之異好而不能以自致必待月

從之而後得遂其所好焉民雖有異欲亦不能以自致必待上之人仁政有以及之而後得以遂其欲焉然則為民父母者固當思民之好惡為之趨利避害以慰其俟望之情可也如此其義方足

今案禹治水功成洛龜呈瑞禹列為九疇箕子傳禹之學以授武王耳九疇者帝王治天下之大法列為九以示後世然後為帝王之明範唐虞以來典籍具備可歷舉也六府允治五行敘矣精一執中五事至矣百工惟時八政修矣歷象璿璣五紀協矣戒董勸

歌三德又矣鬼神其依龜筮從矣地平天成庶徵時
矣九德四罪福極分矣九疇順敘皇極建矣

旅獒

德盛不狎侮狎侮君子罔以盡人心狎侮小人罔以盡

其力

德盛則自然無狎侮之事有狎侮皆由德未盛故也下文不矜細行終累大德意正如此君子言盡

心小入言盡力各以其分言也

不後耳目百度惟貞玩人喪德玩物喪志

不後於耳目之欲以庶邦

惟正之供德之盛也德盛則自不玩物又豈有狎侮之失玩物則珍禽奇獸之屬此篇本為玩物而作然

玩物必至於輕人故以玩人狎侮並言蓋防微杜漸之意喪志者言趨向卑下為物欲所陷溺也喪德者言素有諸己者或因是而失也

志以道寧言以道接

慎德二字為旅獒一篇之綱領此二語又為慎德之綱領此言內外

交養之學惟一於理而已靜而養其中循夫理而不危動而應乎外審諸理而不謬聖賢傳授之學不越是二者而已志以道寧者存養之功所以立天下之大本道之體也言以道接者省察之要所以行天下之達道道之用也此承上文志字而言遂及存心養性之事

金滕

予仁若考能多材多藝能事鬼神乃元孫不若旦多材

多藝不能事鬼神

周公勞而不伐謙莫如周公此對三主在天之神自伐如此何也家國事

重一時愛兄之心勝矜伐謙抑所不暇計抑此類乃聖人惟德動天處未可以輕易議之

我之弗辟我無以告我先王

辟字訓釋有二義遂為今古諸儒不決之訟今案朱

子手書與仲默一段議從避居東都之說手書的非說傳蔡傳訓解皆用手書中語從鄭氏說至詩傳釋鴟鴞詩又不從鄭說則朱子於此尚未決況在諸儒今以書文考之言居東二年又似有避居之事下言罪人斯得又似致辟而得其渠魁又蔡仲之命本序云惟周公位冢宰正百工羣叔流言乃致辟于管叔因蔡叔降霍叔則分明流言之後即有致辟之事蔡傳言流言後周公避居東為詩貽王成王既悟迎周公歸三叔懼挾武庚以叛周公始請命成王東征往還又自三年此乃蔡傳臆說以文避居之旨考之經

文殊不然也又以詩考之狼跋言公孫碩膚赤舄几
几又似有避居之事觀鴟鵂之詩其志切其情哀多
是已誅管蔡後作史傳紀載既不可考詩書之文只
如此未免諸儒議論不決然以一時事理推之恐致
辟之說為長避居之說恐不然也何也由湯至於武
丁賢聖之君六七作商德之在人心舊矣一旦殷民
苦紂之虐懷周之仁故殷亡而周興然革命之後殷
民洵洵未已向微周公繼之未易靖也武王崩成王
幼周公位冢宰正百工雖未踐天子之位而實攝行
天子之事三叔流言語侵成王周公此誠家國重事
周公不即遏絕禍萌而乃避嫌疑退居散地萬一三
叔乘殷民之未靖挾武庚以叛設或張皇則天下安
危之寄寧忍優游坐視而託之他人乎恐一時事理
亦有不然者為避居之說者議曰三叔方流言周公
豈宜遽興兵以誅之成王方疑周公若請命成王未
必見從若不請而自行亦非所以為周公矣此等議

論在君臣兄弟之大倫而言則甚正大若以一時事
理而推則有不待辨者何也成王幼天下安危之寄
皆繫於周公周公亦以身任之而不疑上自成王下
有公卿百執事惟周公之言是訓是行凡國家所繫
輕重緩急有當行者則必請命於成王而成王必見
從豈有違拂之理况流言之禍所繫尤重周公尤不
當有所避嫌而次且也若伊尹之於太甲百官總已
以聽於冢宰則伊尹亦攝行天子之事也再三訓太
甲而未變則曰予弗狎于弗順營桐宮而置太甲非
放而何或者亦議曰桐宮既營而太甲不肯行則伊
尹當若何此亦與議周公致辟管叔請命成王未必
見從之意同殊未合一時事理也蓋太甲成王之時
天下之大權皆屬伊尹伊尹之心欲行莽操之行
則豈太甲成王之所能制惟其所行之事以迹而論
似若擅天子之權以心而推正所以忠愛太甲成王
之至此乃聖人之所為避嫌有不足論者不知此何

以為伊周謂之任也且如放太甲誅管蔡伊周今日
盡其在己之誠而行之及至事寧之後還政復辟之
時伊周不害其為師傳之尊而君臣大節凜然無一
毫玷缺亦何嫌之足避何疑之可釋哉又如武王克
商牧野之師一朝而清明周公舉六師之東掃除區
區之武庚何至二年乃罪人斯得益發難之原事由
三叔周公舉兵東征亦惟鎮靖東土以安反仄為急
至於武庚新造之邦豈有拒敵之理又況事連三叔
乃人倫之變實周室之不幸固不容逼之以兵直以
文告之辭訊問情實名為伐叛實則鞠囚緩而不逼
務在得實然後加刑當時事體自合如此是以動涉
年月然後隨其罪之輕重以致罰殺武庚辟管叔囚
蔡叔降霍叔不僭不濫罪及四人而已所謂二年亦
舉大約而言見東征在是年而罪人斯得則明年事
也若是則東征之時謂之居東自是實語及罪已定
而周公痛心於管蔡之刑而慚德之懷戚戚然終未

能忽然遽釋於衷於是作詩以貽王以述其悲痛之情王亦未敢請公誦讓也人有不足於其人之所為輒以語侵之謂之讓詳味此一語可見武王崩成王立周公為人小心慎密勤勞王家成王敬事周公惟其言是訓是行曷敢有違但管蔡之誅周公之身正涉嫌疑之地成王之資困而知之者也未免有芥蒂之疑然至貽詩之時終不敢形於辭色而誦公也以此推之可見東征必請命於王王必見從無疑也及至感風雷之變啓金縢之書成王始大感悟昌言責己而昔日纖芥之嫌固有不足論者書文始末若此語脉自可推尋愚故曰辟字作致辟說於一時事理為長者此也雖然辟字雖主致辟之說而朱子與仲默手書一段議論實光明正大之論乃天地常經君臣大義所以存天下之大防杜萬世之口實自當為一編不可廢也

嘗觀蜀先主臨終謂諸葛孔明曰君才十倍曹丕必
能興復漢室嗣子可輔則輔之如不可公宜自取孔
明泣曰臣竭股肱之力加之以忠貞如濟陛下之德
也如不濟請以死繼之先主呼子禪拜床下命之曰
我死爾事丞相如事我也先主既沒國事一聽孔明
總裁後主盡可而已然而君臣體統朝廷法制不敢
有毫髮僭踰漢業之興得尺得寸皆歸之君孔明何
私焉竊意太甲成王時伊尹周公行事亦是如此劉

禪闇弱不足言孔明之心實無愧於伊尹周公蓋善學伊尹周公而肖焉者也又若劉備亦不過一時之雄耳臨終尚能戒其子令事丞相如事我况武王聖人為後世慮至深遠豈無一言戒成王使之服周公之訓乎蓋必有之而紀傳不及載耳故論周公東征請命成王未必見從之說與當時事理不合也書之為經大要講明堯舜禹湯文武周公相傳之道大要論二帝三王之心此雖一字之義繫周公之心固不

得不詳辯孟子曰周公使管叔監殷管叔以殷叛則
流言之禍起自管叔蔡霍亦由扇惑而從耳周公致
辟管叔于商與蔡霍不同想東征時皆拱手待問未
嘗有阻兵拒敵之理

大誥

已予惟小子

已予惟等語多是方言

敷責

責讀如焚音與用宏茲責之義同亦通

予不敢閑于天降威用

閑者塞而不行之謂

以于牧寧武圖功

寧武只是指武王而言文意亦順篇中多用此等語

越予小子考翼不可征

此句中必有脫文誤字

允蠢鰥寡哀哉

言武庚信為無知蠢動但我民之鰥寡則深可哀也

天棐忱辭

言天之所輔在乎誠信有辭不必引民獻十夫為首稱

嗚呼肆哉

此等語甚不可曉想亦是方言朱子以故今釋肆字施於此亦略可通蓋歎息言所以我

今日如此詰諭也若如蔡傳作舒放不畏縮于文意更艱澁

惟大艱人誕鄰胥伐

于厥室

鄰相與為朋之意言武庚三叔相與為姦相攻伐於室中也○案此篇蔡傳凡四節用四國二

字恐皆未穩信四國蠢動此四國宜易為武庚四國勤毖我民此四國字宜刪只依經文天亦惟用平解友以喻四國此四國宜易為武庚三叔叔首大艱之四國亦宜易武庚三叔

王若曰猷

大誥微子之命二篇首皆同蔡傳以為發語詞但猷字乃係實字應有訓釋難謂語辭如

今人尊長呼卑幼與之言未及本事每以但凡道理為首稱想猷字之義亦與此相近亦方言也

康誥

我西土惟時怙冒

蔡傳言至罄西土之人怙之如父冒之如天至罄二字莫若易至盡

天畏棐忱民情大可見

言天命可畏惟輔誠信驗之民情可見民情歸則天輔之民情

不服則不輔之此二句一意小人難保又是更端語

惟弘王應保殷民

保殷民者王之意我之應亦能保殷民則能廣王德意矣

又曰劓刵人

又曰二字疑衍文

要囚服念五六日至于旬時不赦要囚

要字蔡傳如字謂獄辭之要陸

氏作平聲謂拘繫死囚二音雖不同大抵皆是重囚凡決重囚自五六日至于旬又自一旬至于一時不敢即決者蓋以斷者不可復續死者不可復生故必加詳審恐差失誤人命也後世死囚必三申五覆然後結正古人旬時之意蔡傳言為囚求生道語未融

有敘時乃大明服惟民其勅懋和若有疾惟民其畢棄

咎若保赤子惟民其康乂

言為政之道上令下從感應之機自有倫序上之人能明

刑服人心則民亦相戒而勉於和矣去惡之心如去疾則民亦遠惡而不為矣愛民之心如愛子則民亦安於為善而易治矣此三者即有序之目也

已汝惟小子未其有若汝封之心朕心朕德惟乃知汝

惟前已屢言即是方言不必再解詳此三言想是康叔乃沉潛慎密之人故武王以是稱之

矧惟不孝不友子弗祗服厥父事大傷厥考心于父不能字厥子乃疾厥子于弟弗念天顯乃弗克恭厥兄兄亦不念鞠子哀大不友于弟惟弔茲不于我政人得罪天惟與我民彝大泯亂曰乃其速由文王作罰刑茲無赦

所以正民彝

不率大夏矧惟外庶子訓人惟厥正人越小臣諸節乃

別播敷造民大譽弗念弗庸瘵厥君時乃引惡惟朕慙

已汝乃其速由茲義率殺

所以正王度。紂俗之惡大端不過此二者在所先禁也

亦惟君惟長不能厥家人越厥小臣外正惟威惟虐大放王命乃非德用又汝亦罔不克敬典乃由裕民惟文王之敬忌乃裕民曰我惟有及則予一人以懌王曰封爽惟民迪吉康我時其惟殷先哲王德用康乂民作求

矧今民罔迪不適不迪則罔政在厥邦

凡三節皆承上二節言治民之

不善當先責在己之善。敬忌即敬畏也

今惟民不靜未戾厥心迪屢未同爽惟天其罰殛我我其不怨惟厥罪無在大亦無在多矧曰其尚顯聞于天

此一節當有闕誤

酒誥

克羞者惟君克羞饋祀

鄒氏辯蔡傳訓說近是

又惟殷之迪諸臣惟工乃湏于酒勿庸殺之姑惟教之

此言殷之諸臣亦有任舊職任事者惟工者見任事惟湏于酒然猶勞於事但未能遽革舊習未能絕去已私之嗜好雖或私竊飲酒非是故意慢法故不殺之且教之

有斯明享乃不用我教辭惟我一人弗恤弗蠲乃事時

同于殺

此蓋一等之人有無故而在此張筵設席明用燕享之禮不從我之教令不畏我之刑威不潔

治爾之職事此乃故意慢法者故殺之亦怙終賊刑之意飲酒一也或教或殺者事同而情不同故也武

王於篇終舉此二條誥康叔其義大矣蔡傳解意晦恐不通

洛誥

我二人共貞

貞正也我二人共守此正道敬天之休即貞也

公勿替刑

刑法也儀刑之

謂公棄去則人失其儀刑矣公勿替刑則四方其世享矣

多士

我聞曰上帝引逸有夏不適逸則惟帝降格嚮于時夏弗克庸帝大淫佚有辭惟時天罔念聞厥惟廢元命降

致罰

詳觀書中如商書引有夏事周書言夏商事引古昔興亡之由以誥當時多是先言先后能順天道

故天命之後王弗率故天棄之此篇誥多士方舉有夏之事以諭之不應捨夏先后之有道而不言便說桀之不道詳經文意上二句乃言夏之先后有道而安寧如上帝引而置於安逸之地故天眷顧順向而不背棄及後王不能繼承先王之道不往求安逸不法天行不用帝命惟縱淫佚故天亦罔念聞廢其大命而降致罰也弗克上疑有脫字如後嗣王之類○蔡傳引呂刑降格為証文意亦不類詩書中凡言降格皆是上天眷顧其德故來歆之若言天厭棄之則言降災降威降虐降喪不謂降格如呂刑言罔有降

格正謂一時專媚於鬼神故絕地天通
以格去鬼神歆享之說與此文意不類

君奭

今在予小子旦若游大川予往暨汝奭其濟小子同未
在位誕無我責收罔勗不及耆造德不降我則鳴鳥不

聞矧曰其有能格

此章上小子既是周公自稱下小子不應又指成王詳文意皆周公自稱

收錄用也言當今濟時之艱皆在我二人其任大責重如此我若未為國家所用與未任位之人同則雖大事不能責及於我今我二人既為國家收用而在位乃不勉其所不及則責及於我矣爾若棄去則老成之行膏澤不下於民靈瑞之應不可得而復聞况望其能感格於天乎時舉鳴鳳者成王曾遊卷阿鳳

鳥鳴於高岡乃召公繼成王之歌而作卷阿之詩想當時此事人尤以召公為首稱故周公於此特言之亦以歆動召公之心而救勉之耳

予不允惟若茲誥予惟曰襄我二人

襄字蔡傳不釋當與贊襄之意同言

余曰贊襄之力惟我二人而已成字未穩不允不惠猶言不顯不時之類言我既不信於汝而若此誥乎豈不順於此而若此多誥乎朱子詩傳言古人聲心而然

案周誥諸篇多用方言又多闕誤故多有不可解雖傳依文解終是牽強處多此篇尤甚蓋此篇乃周公留召公之辭周公之言本是質而深況此乃是二人

覲面無人之頃肺腑中流出方言尤多如天壽平格
割申勸勗偶王等語縱牽解亦不通

蔡仲之命

懋乃攸績睦乃四鄰以蕃王室以和兄弟康濟小民

言當

勉立其功以外則盡邦交之禮以上則致忠君之心
以內則輯睦親族以下則安養小民言小民鰥寡無
告發政施仁所當先也懋績者
四事之綱四事懋績之目也

率自中無作聰明亂舊章詳乃視聽罔以側言改厥度

上章教以經邦為政之方此則告以修身處事之要
言但當循天理而行勿肆己私而敗已成之法制審

物則而動勿惑於邪而失本然之裁制人受天地之中以生所謂命也不偏不倚無過不及率自中即中庸率性之謂道乃人事之當然也度者吾心之裁制所以量度事物之長短而合其宜即所謂中也視思明非禮則勿視聽思聰非禮則勿聽此本然之則亦中而已先王舊章中之著也人能審其視聽不失其本然之則則邪僻之言無自入合於度而協於中苟或作聰明則小智自私邪言易入失度而過中先王之法亂矣上一截是存諸中而應乎外下一截是制於外所以養其中召公告武王志以道寧言以道接意亦相類然彼乃學而知此則困而知者此乃聖賢人已交修內外兼養之學而蔡仲亦與聞之亦可謂賢矣

多方

惟帝降格于夏

詳此句亦謂夏之先后有道故天降格之及至後王縱逸淫昏不道始為天所

棄爾蔡氏謂此上當有闕文意亦如此

不克開于民之麗○至于百為大不克開

不克開者閉塞而不通也

立政

休茲知恤鮮哉

恤憂也知恤亦兼人已而言人君當憂不得其人居其任者當憂不能盡其職

籲俊尊上帝

籲呼也凡書中言籲字皆訓為呼此章蔡傳以求賢釋籲俊蓋人君切於求賢念茲

在茲名言茲在茲口不絕聲於求賢故曰籲俊周公之辭簡而深此類是也

迪知忱恂于

九德之行乃敢告教厥后

蔡傳言夏之臣蹈知誠信于九德之行乃敢告教其君此

所謂臣乃當國大臣位冢宰正百工者非庶臣也如伊尹于太甲周公于成王所謂告教厥后雖指有夏大臣乃是周公所行實事宅乃事宅乃牧宅乃準宅居也安宅如居其位者德稱其職無纖毫罅隙之可議則安居而不危故謂之宅苟德有不稱則職有曠廢而不安矣古人用字簡深若此

嚴惟不式克用三宅三俊

嚴惟者其難其慎之謂簡擇於未用之前既用之必使為

政於天下不式者信任於使用之後

亦越文王武王克知三有宅心灼見三有俊心

宅俊皆以心言

恐無優劣深淺宅言克知俊言灼見互文以並見爾

文王惟克厥宅心乃克立茲常事司牧人以克俊有德

人即準人也言文王惟能克知三宅之心故能立此
常任常伯準人之官又以其能灼見三俊之心亦皆
有德之士足以居三宅之位者此乃申結上文克知
三宅灼見三俊之義上文又言立政任人準夫牧作
三事牧只一字指一事與此言常事司牧人文法正
相似古人立言理義無不足而辭語或參差不齊若
蔡傳說人字遂為衍文況準人之職守
一代之法以為四方標準又容可略乎

文王罔攸兼于庶言庶獄庶慎惟有司之牧夫是訓用

違

舉牧夫而不及常事準人者
言有司則三事皆在其中矣

繼自今我其立政立事準人牧夫我其克灼知厥若

若者

順於理也三宅克即宅三俊克即俊德稱其職為順
不稱則逆於理此以克灼知參錯並言可見上文克
知灼見乃並和我庶獄庶慎時則勿有間之文王罔
言而互見爾
敢知者無使君行臣職也時則勿
有間之者無使小人貳君子也

以觀文王之耿光以揚武王之大烈

文王言耿光武王
言大烈以人所易

見而言蔡傳分屬德業謂各於其
盛者稱之程子曰聖人亦無不盛

繼自今後王立政其惟克用常人

案此篇首言常伯常
任準人其後言雖參

錯不齊不過三事為急先務三宅三俊以位言克即
宅克即俊以德言下文言三事實德每變文不同曰
克俊有德曰義德容德曰厥若曰成德之彥曰吉士
名雖不同其為實德則一也至篇終乃曰惟克用常

人反若居三事之位者其才德無以甚異於人非有出類拔萃之才驚世駭俗之智者然後知聖人用人正用常德之人而作聰明以賢智先人者皆聖人所不取也

君陳

爾有嘉謀嘉猷則入告爾后于內爾乃順之于外曰斯

謀斯猷惟我后之德

葛氏曰成王殆失斯言欲其臣善則稱君或曰成王舉君陳前日已

陳之善以美之

殷民在辟予曰辟爾惟勿辟予曰宥爾惟勿宥惟厥中

詳此章成王之告君陳有交相責難之意則上章所言欲其臣善則稱君恐非本旨只作舉君陳已行之

是事為

爾無忿疾于頑無求備于一夫必有忍其乃有濟有容

德乃大

此四句當共作一節承接只一意忍者懲忿窒慾之謂故訓為含忍言應事接物之時亦有當

且含蓄容納不宜便形諸聲色傷於急切亦恐誤事有容德乃大此五字只宜作一句此容德與前篇容

德同義秦誓言一个臣其心休休其如有容此等人正所謂容德者最為盛德忍與容只是一事皆接物

和而不由之意但忍出於有意容德則本乎自然忿疾於頑求備一夫乃不能懲忿窒慾之故此言人有

甚愚而未化者亦宜寬以待之若不勝已之忿而疾之太甚則或能致亂人之任使當隨其才器而用之

不可責備於一夫若責備於一人則無可任之人而職有曠廢若此者皆不能忍故言凡事必有容忍然

後有濟又等而上之若有含弘寬裕之德則功業之效尤極昌盛不但隨事有濟而已

康王之誥

張皇六師無壞我高祖寡命

蔡傳後世忘祖父之讐口不言兵數語為宋南渡後

君臣而發

則亦有熊羆之士不二心之臣保乂王家

此康王始誥羣臣諸侯以

熊羆之士為首稱視湯武大誥天下語大有逕庭矣

畢命

樹之風聲

此兼上下文表宅里殊井疆而言欲使遠人聞彰善癉惡之法以廣懲勸之道也

政貴有恒辭尚體要

常而可久之謂恒政有恒則民信而易遵守屢更改則民疑而無所

措質實之謂體切直之謂要凡上人出令惟欲下民知上之意而從之辭令質實而不文切直而不泛則民易從而事亦可行若繁文無實則所令反其所好而民不從矣厭常喜新謂之好異商俗靡靡以利口為賢正厭常喜新之弊辭失體要而政不恒所以民叛之可不念哉

雖收放心閑之惟艱

言今治殷土之道雖曰但使之收其放心似若不難而其實則防閑

之猶甚難也

資富能訓惟以永年惟德惟義時乃大訓不由古訓于

何其訓

資富能訓既富而教則必無驕而好禮由乎德義監于古訓無怙侈滅義驕淫矜誇之失安享

所有不干刑憲而桎梏死者資富能訓教之序也惟德惟義教之實也由于古訓教之式也

君牙

弘敷五典式和民則爾身克正罔敢弗正民心罔中惟

爾之中

乃式用也不必訓為敬言天生烝民有物必有則乃民生固有之常性非取諸外而附益之惟其

氣質之偏物欲之蔽故失其中正而陷於一偏所以大布五典之教亦惟以和其民本然之則而已謂之弘敷者無有一民或出于五教之外者謂之式和者但使之不乖其本然之性而已初非有所勉強也教民者先覺覺後覺因其固有而導之耳正則無邪僻中則無偏倚正言身五典之行著於外發皆中節道之用也中言心五典之理存於內未發之初道之體也中正則合乎民則而無不和矣蔡傳見舜命契言

敬敷五教故以敬
訓式正不必然

問命

僕臣諛厥后自聖

孔子曰一言可以喪邦曰惟其言而莫予違子思言於衛侯曰君之政事

日已非矣君出言自以為是而臣下同聲賢之詩曰具曰予聖誰知烏之雌雄抑亦似君之君臣乎然則僕臣諛厥后自聖所繫為甚重故此特言之

非人其吉惟貨其吉若時瘵厥官

瘵病也任人不得其而以貨則為不得其

平而病其職矣

呂刑

皇帝清問下民鰥寡有辭于苗

鰥寡讀屬上句
於文理差順

穆穆在上明明在下灼于四方罔不惟德之勤故乃明

于刑之中率乂于民棐彛

穆穆者天子之容明明者羣臣之德人君端拱無為人惟

見其容故曰穆穆在上羣臣分治庶職辨析明察故曰明明在下君臣之德著于四方亦惟務以德化民而已及不得已而用刑則亦惟明夫中道而治民以輔其常性而已罔不惟德之勤蔡傳作民觀感為善說恐費力

典獄非訖于威惟訖于富敬忌罔有擇言在身惟克天

德

擇選也忌畏也擇言當作絕句在身屬下句言刑獄至重必得剛明之才不畏強禦不貪賄賂故其法不

惟得盡用於勢家亦得盡用於富人刑獄乃民命所繫不可不敬又不可不畏忌亦極畏之意惟其敬畏之至則必詳察獄情求至當之理為一定之論其言不可選擇如可選擇則有二議用法者將有推移受刑者將生希覬非典獄之善矣惟其無擇言則己身能純乎天德謂之天德者天命天討皆有一定之理曷常可擇此一節所稱之人非伯夷臯陶不足

以當之蔡傳解罔有擇言在身處不甚明白

罰懲非死人極于病非佞折獄惟良折獄罔非在中察辭于差非從惟從哀敬折獄明啓刑書胥占咸庶中正其刑其罰其審克之獄成而孚輸而孚其刑上備有并

兩刑

此一章當分為三節皆申言上文告有邦有土之語言罰以示懲雖或免死然財乃民命出金之痛

亦已甚病口辯之人若使斷獄其於人之是非曲直雖若辯析然未必得民情之實溫良忠厚之人使之斷獄雖或寡言然必能得民之實情不用佞而用良則刑無過不及之差矣此一節申明何擇非人之意差等也民之辭有等而法律亦有等察其辭而監於等有犯是罪而不當從是律者有犯是罪而當從是律者情實異不等故也故必哀敬以斷之哀者惻隱不可強暴敬者重慎不可輕忽蓋斷者不可復續死者不可復生可不哀敬而用刑乎又必明開法律之文而與衆共謀度之哀敬者盡吾心之仁明啓胥占者資衆人之見能如此則庶幾皆無過不及之失至於案律罰金之時尤加審克此一節申明何敬非刑之意獄成者案已具也輸者犯人自吐其情款也獄已具用刑之人皆信其刑罰當而無失受刑之人亦信其刑罰當而無憾上備猶加多也獄之初興或只一人而辭之所逮或及兩人初只一事而情之連引

遂及兩事由是加上而備多故曰其刑上備有并兩
刑夫獄既成用刑者信其無失固已為難至於受刑
者亦自信而無憾為尤難獄之初起於一人其推讞
固宜哀敬審克至於逮繫連引之多尤宜哀敬審克
故此二條特言於終以明折獄之道必如是而後為
至此一節申明何度非及之意○管仲奪伯氏駢邑
三百沒齒無怨言蜀李嚴有罪諸葛孔明黜之孔明
卒流無涕此所謂輸者也○此一節蔡傳儘好但末
一條管見頗異望
通是經者再訂之

明清于單辭

單盡也於
義亦通

五經蠡測卷二